





咸平集卷第二十四

京兆田錫

表二笏記附

賀田重進奏捷表

臣錫言今月五日進奏院狀報十一月三日定州駐  
泊都部署田重進奏殺下蕃賊并奪到鞍馬衣甲器  
械不少者伏以師出以律動必成功天道惡盈叛必  
先討多壘已平於千里捷書何止於百函中謝伏惟  
皇帝陛下義軒道德湯武功勳寰區已致於升平黎  
庶方躋於富壽彤闈日旰猶聽政於萬機清禁漏殘



已求衣於五夜動圓穹而感方載祥瑞畢呈左滄海  
而右流沙車書混一豈謂垂衣之化未賓左袵之人  
舞干羽以不來出車徒而薄伐一之日則壺漿滿道  
來近王師始則汙染之人背胡沙而歸漢土二之日  
或力屈來降或因猶思鬪此乃腥羶之衆依水草而  
擾邊疆廉頗諳練於邊機魏尚弛張於方略風毛雨  
血比驅獵於戎夷神算天機已蕩平於區域

二

臣錫言今月五日遼中報十二月五日定州駐泊都  
部署田重進等奏易州十一月二十二日契丹賊軍

入界打劫遂差三指揮却往北界二十八日打破歧  
溝關殺下賊軍一千餘人收虜到鞍馬牛驢不少所  
有歧溝關城內錢帛糧草衣甲及人戶舍屋並摠燒  
燹訖今月八日内外文武百寮稱賀者伏以邊上捷  
音遠聞於旒宸寰中喜氣高薄於雲天中謝臣竊以  
戎人犯境蕭關必務於驅除猛士守方沙塞果聞於  
克勝伏惟皇帝陛下躋民壽域偃伯靈臺列達衢於  
八荒執玉帛者萬國契丹獨建諸族尚未來王稽塗  
山後至之誅逞代馬新羈之患廟堂成算既增貌席  
之威將帥立功式表雷霆之怒

二



臣錫言今月三日進奏院狀報十二月十八日定州駐泊都部署田重進等奏十二月二日殺下契丹五千餘人收衣甲器械不少者伏以兵機貴速矧如時雨以行師戎壘盡平屢慶使星之告捷中謝伏惟皇帝陛下王道方融立功不宰消厲階於邊鄙躋壽域於生靈周宣伐獫狁之詩已流金石漢史滅匈奴之榮既委廟堂千里天山已為內地三秋沙漠永息驚烽農夫野以耕桑將吏勞旋於封爵玉關虛候混書軌於外區金榮告成讓功庸於上帝臣忝權符竹限遠關連

賀南郊表

臣錫言於洛州伏覩今月十七日赦文南郊禮畢者禮盛嚴禋恩覃在宥凡樂文明之化寧勝舞蹈之歡中謝伏惟應運統天睿文英武大聖至明廣孝皇帝陛下聖德日新睿謀天縱晉越既歸於土宇華夷遂混於車書貞觀太平未侔今日開元無事豈及此時公卿既上於鴻名玉帛爰新於祀典一陽來復隨德澤以融和肆赦從寬霈恩波而滌蕩幽囚盡釋逋欠咸蠲軍功示悅賞之誠戎莽布懷來之信贈加風樹



封及閨闈還客官資復以出綸之命遠人家屬遂其  
懷土之心念功先厚於榮勳卹物下周於掩骼連山  
觀象既符作解之恩率土歡心大慶禋宗之禮臣限  
拘所職不獲奔詣闕廷

二

臣錫言本月五日伏覩制書南郊禮畢改元大赦者  
臣已畫時宣諭訖伏以郊廟薦享神人以和至誠既  
達於圓穹慶賞遂周於率土覆載之內抃躍皆同中  
謝伏惟皇帝陛下端拱無為太平已致兆庶既躋於  
富壽萬靈方效於禎祥所以祀天報光大之功為民

禱豐穰之福升禋纓畢惠澤旁流囹圄久空仍布青  
災之令萑蒲無警六覃肆赦之恩征賦已輕更令蠲  
復徵償至寡咸許復除天波蕩滌以無遺王道坦夷  
而有截勳庸先賞勞効均酬俾人敦修睦之風命之  
封蔭延世舉卹孤之典榮以存亡加以矜寬居作之  
人牽復左遷之吏和氣周物祥光麗天所以曆授人  
時遂改雍熙之號禮成樂備佇封禪之儀臣限權  
六條方遙雙闕不獲奔詣玉階無任歌樂聖抃蹈  
激切屏營之至

謝轉起居舍人表



臣錫言今月七日遞中伏蒙聖恩賜臣官誥勅牒特授臣起居舍人依前直史館者祇膺寵命遭陟華資不離近侍之班俄忝記言之職徬徨拜受榮懼交并伏念臣遭遇明時踐揚清貫才識固慙於兼茂勤勞常愧於未伸遺補美官繼塵閨籍封章鄙見嘗受聖知加以兼館殿之清華歷藩宣之委寄榮踰始望忝已居多豈謂纒畢嚴禋遠霑慶澤珥筆丹墀之下戀闕采深頌條滄海之濱尔憂豈稱敢忘恭恪以贖貪饕

陳州謝恩表

臣錫言臣去年十二月二十七日蒙恩改授官資兼受勅權知郡事已於今月八日上訖祇膺朝命頒守詔條內省非臨蒞之才外任當重鯨之寄感戴恩寵雖實知榮夙夕憂惶何以致理中謝臣每念文學之性固無所長諒直之心庶幾有補始自祕省擢升諫官初上封章遽蒙聽納尋下御札徧求直言仍賜臣勅書以示嘉獎以臣所言者罷交趾之役以臣所諫者去髮鉗之刑其餘所陳不敢備述勅書喻臣曰今後凡有見聞更在無辭獻替或行或寢斷自於朕心盡節盡忠勿渝於爾志臣所以嘗思啓沃上答聖明



每有見聞必陳章疏非敢沽直臣之譽但欲酬英主  
之知臣蓋遠人幸逢昌運冒涉遐阻入關知蜀道之  
難孤苦零丁挈家比秋蓬之轉遇陛下初登寶位親  
主文衡於七一四中忝第二人及第不數年列在遺  
補帶館殿之職先年擢知制誥為侍從之臣忝幸  
若斯報答無所去歲稍因愆亢方軫念勞臣奉勅於  
太一宮禱告靈仙祈求雨雪臣所以輸忠罄節因事  
上言多狂愚事頗切直天聰采聽方有施行聖慈  
優容幸無罪戾洎陛下受寶榮以新徽號御正殿以  
朝千官臣以歲節假中先受恩命為差出則無告

謝未朝謝則無因立班行事捧榮之儀空思珮委祝  
壽稱觴之禮不與山呼戀闕之心但傾葵藿頌條之  
寄若履冰淵朝廷重委之榮懼不克荷交親相勉之  
意亦有所聞以臣屢因上書致茲落職雖文翰之職  
豈臣所能而物論之間以臣為誠臣心匪石雖獲罪  
以寧辭衆口若鉗豈達聰之有補況臣迹踈性拙言  
直道孤慮公事之闕遺去天顏之咫尺敢不躬親郡  
政上副憂勤佩服官箴免孤任使然錫盡心無愧期  
百生酬君父之恩揣分自知重兩制比神仙之職

海州謝恩表



臣錫言伏蒙聖慈以臣蒞事踈遺錄問淹滯尚寬恩宥責授檢校右騎散常侍海州團練副使已於今月十一日到州訖祇膺朝命感懼難任中謝臣聞懲勸欲行賞刑必正示無私於天下表至理於區中實聖明所守之先綱紀有常之始臣素無才識本乏聲塵每念生於劔南鄙在草野父母訓勵早令讀書鄉里薦稱遂謀干祿相繼數舉未成一名洎朝廷書軌混同文物光被臣始攜持老幼涉歷險艱往來咸秦羈旅京闕值陛下嗣登寶位振起儒風微才不遺羣英咸至臣年三十九及第便授官資達不因人驟升華

貫閣下三載每愧忝厯淮陽二年遂致遺曠據其罪戾合竄遐荒尚蒙宥過之恩俾列副戎之秩東海之郡去京不遙南風之薰順流而下程途自便骨肉隨行罪重責輕恩深感極洩涕知幸驚魂省躬循過咎之所因荷生成之罔極披陳愚懇雖在表章叙罄感懷合貢歌詠謹奉表稱謝并進五言感聖恩詩二十三韵干冒宸嚴以聞

謝量移單州表

臣錫言今月四日進奏院遞到官告一通勅牒一道責授單州團練副使散官勳如故者五色絲綸頒於



海上貳車官秩移近京師既拜命以欣榮彌省躬而  
感懼中謝伏以禋宗云畢慶賜遂行捨爵榮勳方霈  
惟新之澤赦過宥罪遐均作解之恩臣每念遭逢驟  
塵清切入居綸閣莫伸潤色之勞出典郡符有悞憂  
勤之旨俾從左官尚未周星爰遇嚴禋例該殊渥滄  
溟之上隨槎汎以將歸白日之輝覺葵傾而愈近敢  
忘補報仰荅休明

謝特授工部員外郎表

臣錫言臣今月二十六日蒙恩特授工部員外郎為  
無例於宗政殿告謝尋於二十七日謝恩訖臣伏覩

臺司引見左降官凡百餘人唯臣獨授官資復齒班  
列循省榮懼不知所裁中謝臣伏以受恩特深叙感  
亦切苟不披露肝鬲敷陳始終則何以表聖人特達  
之恩何以見微臣遭逢之幸伏念臣稟受之性愚直  
自知遐遠之人孤危自奮遇陛下肇登寶位親主文  
衡臣詞藝非長器能無取軒墀之下賜以榮名科第  
之中復在殊級揚歷官序便居侍從之班臨蒞公途  
常守廉勤之節此外不忘筆硯載成詠歌始因進升  
平詞擢為諫官後因上封禪書令知制詔遷授非次  
報荅無由是以有所見聞輒形章疏靡詳事理屢貢



芻蕘臣子之心唯思謹切君親之意不罪狂愚陛下  
所以賜臣獎諭勅書欲廣上言之路陛下因臣特降  
御劄旁求敢諫之人德至明而無不照臨道至大而  
無不包納臣又嘗因聖節輒貢蕪詞蒙陛下怡天矐  
而優容降宸章以宣和臣又嘗因時雪輒進歌行珠  
旒亦賜於披觀金口曾垂於嗟賞臣至愚至陋無藝  
無能有如此微榮有如此遭遇雖殺身無補於萬一  
而過分寧免於顛躓洎閣下改官淮陽典郡素無政  
術但守詔條然京輔之間豪猾難理州郡之職智慮  
不周負陛下拔擢之恩孤陛下憂勤之旨致有公過  
上煩聖聽每思受恩既異於常倫受責亦宜於加等  
陛下尚寬朝典俾副戎車不踰年逢赦量移未周歲  
抽歸引見臣得生還帝里獲面天顏慶幸已多私願  
已適豈期聖造復寘周行自衆多罪人之中授清華  
外郎之秩拜官之後受命以來夙夜省循俯仰慙懼  
感君恩之特異倍激私誠慮公道之或虧實憂官謫  
將何名節用贖踈遺敢不遵臨深履薄之言守補過  
盡忠之訓冀伸微效上荅鴻私

代李給事惟清讓密地表

臣某言今日伏蒙聖慈賜臣官告勅牒以本官同



僉署樞密院公事者絲綸之命恩出非常樞務之榮  
任當不次循涯增惕聞寵若驚中謝臣聞天高聽卑  
陳力就列古既存諸方榮今得敷為讓章切以臣本  
諸生素非奇士偶讀書史遂玷科名遭逢盛時驟居  
清列才能無取器業無聞歷官以來微効蕝有常憂  
殞越每誠滿盈而陛下擢於流品之中寘諸華顯之  
職陞為大諫謹言無補於清朝遷拜冬郎駁奏豈伸  
於厥職才微任重既而罷錢穀之司責淺恩寬尚命  
以藩宣之寄番禹重地交廣要衝上奉詔條外撫荒  
服敷宣朝旨遵守官箴飲冰潔於誠心食蘖苦其清  
節洎改轉輸之命慙非幹濟之才三年海濱偶免遺  
曠千里闕下仰戀聖明詔書爰來冕旒入覲未踰月  
復其官秩不浹旬授此恩榮兢惶失圖寵用過分蓋  
深嚴之地近密之謀非臣顛蒙所能負荷况今提封  
萬里守在四夷帷幄之謀軍國之務英主裁斷近  
僉同臣也何人敢言是選伏乞陛下特廻成命俯亮  
愚衷別擇才能以裨任使則微臣有妨賢之責敢不  
罄陳陛下垂則哲之明必俞所讓

賀傅潛等奏勝捷表

臣錫言今月八日進奏院狀報鎮定高陽關馬步軍



都部署傅潛等奏九月十七日先鋒都監石普等殺  
下蕃賊二千餘人斫到賊頭五百个奪到馬五百匹  
衣甲器械不少奉聖旨取二十五日稱賀者伏以明  
君御宇聖謨方協於天機猛士守方武略咸遵於廟  
算果致平戎之績以成禦寇之功凡在照臨孰不歡  
慶臣嘗讀漢書每籌邊事當文帝承祧之始有匈奴  
犯塞之虞騎入雲中兵屯細柳但設備胡之榮未聞  
克狄之功伏惟崇文廣武聖明至孝皇帝陛下道冠  
成康德高文景承太祖太宗之大業應無為無事之  
昌期三邊平寧萬邦謐靜禋祀宿齋清廟方表孝思  
効慶靈者百神執玉帛者萬國豈犬羊之衆敢肆猖  
狂勞貔虎之師遂行翦滅以前茅之斥倏成破竹之  
功勳捷奏星馳朝聞旒冕歡聲雷動夕徧寰區千官  
慶武定之基四海仰威加之德臣伏限所守不獲稱  
慶闕

賀冊尊號表

臣錫言臣伏覩報狀宰臣百官上冊尊號者伏以聖  
主承祧方新鳳曆羣臣推美爰上鴻名魏、既與天  
比崇赫、同大明之照凡在履載無不歡呼中謝臣  
早逢昌運常事先朝見盛德大業之光輝成績善餘



慶之昭報仁莫先於守位孝莫大於揚名伏惟崇文  
廣武聖明仁孝皇帝陛下寶祚傳昌璿圖毓粹三載  
諒陰之禮候紀爰周千官拱極之推崇敢後以為  
至道廣大上玄崇高經天緯地謂之文禁暴戢兵謂  
之武惟睿日聖燭理為明孝惟百行之先仁冠五常  
之首封章屢達聽覽方迴冲讓合於道樞虛受符於  
易象尚以薦享清廟禋祀郊丘方從徽美之稱以示  
後先之式恭以春秋鼎盛皇王節高雖成康仁賢豈  
迨盛烈文景儉靜孰侔嘉猷慶賜浹於華夷大禮光  
於典榮南山在詠永隆萬壽之期北極居尊益表千  
齡之運臣限拘符竹方遠闕遊不獲從玉輅之清塵  
侍祠俎豆捧寶函之編簡就列軒墀

咸平集卷第二十四終



咸平集卷第二十五

表三  
芻記附

賀大赦表

京

兆

田

錫

臣錫言臣 月十四日伏觀制書大赦天下者伏以  
聖德廣大鴻名昭章報功于天推恩逮下發渙汗之  
大號示乾健之垂文慶賞兼行罪戾並釋履載之內  
歡呼畢同中謝臣聞郊祀天地配享祖宗孝莫大於  
斯禮莫盛於此伏惟崇文廣武聖明仁孝皇帝陛下  
紹登寶位繼守丕圖英睿稟於自然仁和發於至性



三載恭默萬方平寧示慈惠則刑約條科念忠賢則  
委用耆舊文德在省禮樂居先武功其神暴亂自阻  
以一陽來復有事于南郊肆赦遂行宣令于北闕夕  
徧天下先陽春而布和風行域中與品物而更始釋  
放刑禁矜寬過尤蠲復租征招懷違叛勲勞先賞遺  
滯苟求惠享博發恩加存沒合天波之蕩滌同壽域  
之躋升鳳儀九成方樂升平之化山呼萬壽佇觀封  
禪之儀臣恭守詔條遠在淮表執籩豆而侍祠祭就  
列無由傾葵藿而仰照臨馳誠但切

謝加勲表

臣錫言臣今月九日伏蒙聖慈賜臣官告一通勅牒  
一道加上柱國者祇荷寵光不任感懼進受勲級弥  
覺忝塵伏念臣幸逢昌運早踐周行東觀西垣揚歷  
斯久內遊外郡委任非輕慙無茂異之才上答照臨  
之德今以郊祀云畢慶賞方行是先春布令之辰與  
物惟新之際懋功業者酌其爵土旌績効者轉以勲  
階臣素無微勞亦受殊賜柱國蒙於上字既荷峻遷  
勳節發於中誠敢忘盡瘁

行在起居表

臣錫言今月十五日遞中伏觀御札以逆胡犯順大



駕親征法天道之運行舉王師以薄伐百臣受職二儀儲祥風霜助肅於皇威金玉必貞於聖臣錫伏限所守不獲扈隨

賀聖駕還京表

臣錫言今月七日伏觀制置茶鹽司報狀聖駕正月二十二日還京者伏以萬方係望鸞輿景從以天旋六師凱還鳳闕榮勳而飲至照臨之下歡慶畢同臣聞聖明御宇既任賢撫理以安民夷狄犯邊則命將驅除而出境布在方榮形於詩聲伏惟崇文廣武聖明仁孝皇帝陛下嗣啓丕圖恭臨大寶聖文神武稟

自天資睿算英謀諒符幽贊八表混同於書軌百蠻奔走於梯航詔邊吏以戢兵來遠人以修德而契丹久隔朝化未復禍心侵軼邊陲劫略生聚疆場飛奏將帥請行聖慈軫卹於黎元大駕躬親於征討天道助順王師立功不朞月而塞垣謐寧未踰時而車輅旋復星辰環拱既瞻北極之尊士庶山呼佇慶東封之禮臣忝分朝寄遠限淮濱當鳴鸞順動之時無由扈從及翠鳳迴還之日莫遂班迎仰首堯天向日但傾於葵藿馳心魏闕朝宗空羨於波瀾

賀德音表



臣錫言今月九日遶中刑部牒連到德音釋放罪戾  
及蠲免逋欠招懷違叛旌舉勞能者已畫時施行申  
奏訖伏以漢殿凝旒百辟慶朝元之禮舜絃應律萬  
方覃在宥之恩凡仰照臨孰不慶抃中謝臣聞順時  
布令必欽若於典章視朔臨軒宜普行於恩澤伏惟  
崇文廣武聖明仁孝皇帝陛下動天以德守位以仁  
建中于民推恩待下金玉必貞於王度地天文泰於  
昌期以月紀蕤賓日當初吉袞冕升太微之座星辰  
羅拱極之班君臣會朝盛禮斯畢雷雨作解恩制遂  
行歡聲遐徧於八紘喜氣盡浮於雙闕德音所至庶  
獄咸空惠渥旁流逋租盡釋卹滯淹則吏負減選示  
綏懷則寇盜攸歸捐軀為國者存歿霑恩抱器懷才  
者薦揚有自風行北上既符發號之文雲起封中佇  
慶告成之禮臣謬膺朝寄遠奉詔條星霜再周末展  
涓埃之効軒墀久別但傾葵藿之心

賀老人星見表

臣錫言今月十六日進奏院錄到宰臣與百寮詣東  
上閤門拜表賀老人星見并批荅者伏以聖君御曆  
自膺萬壽之期上帝垂祥方協千齡之運中謝臣聞  
動天以德由誠信發于中與日齊明謂照臨造于下



伏惟崇文廣武聖明仁孝皇帝陛下纂承二聖勤勞  
萬幾以大舜仁孝之心嗣守洪業以軒皇清靜之理  
撫安生靈時當太平物遇至化和氣所感殊祥遂臻  
南極見乎壽星東璧燦其垂象應秋分之日當夜朗  
之時兆民式瞻仰黃明潤大之色太史伏奏還祉祐  
昭章之符洪範休徵一日富二曰壽陛下富有萬國  
壽比南山宰臣百寮既獻華封之祝微臣外任但懷  
子牟之心魏闕來歸將僅于三載堯樽上壽阻與于  
千官

賀尅復益州表

臣錫言十月三十日進奏院報十月八日閣門准樞  
密院劄子雷有終等奏九月二十日已取下益州城  
池入城殺下賊軍三千餘人所有在城百姓並無殺  
害已招安訖九日文武臣寮稱賀者伏以聖君御極  
當書軌之混同叛卒逞謀怙山川之險阻梟巢既破  
龜城已寧凡在照臨孰不慶抃中謝伏惟崇文廣武  
聖明仁孝皇帝陛下謨猷天縱道德日新至信及於  
豚魚深恩被於草木昨以坤維分野民或罹災井絡  
妖氛兵因致討成算授之於中禁捷音自至於外區  
劔閣先平刀州後破王師出如時雨儒臣應於將星



果成克捷之功共樂升平之慶臣忝分朝寄遠在海  
陵闕却吏之飛申已除小寇聞鼎司之入賀盡率具  
寮限守土於淮濱阻綴班於闕下誠如葵藿但傾向  
日之心迹在江湖空羨朝宗之浪

賀殺下王均表

臣錫言今月五日進奏院報雷有終差寄班供奉官  
安守忠到關奏石普楊懷忠馬貴同共部領軍馬往  
榮州路趕趁潰散軍賊王均等十月三日到富順監  
楊懷忠馬貴前陣先與賊人相見一合殺下軍賊斫  
到王均首級搃殺招降到賊人并草補人負等共六

千餘人奪到衣甲器械物色不少其賊並已翦除靜  
盡奏聞奉聖旨割與中書閣門御史臺取今月二十  
二日稱賀者伏以王師所至無不成功睿略遐宣屢  
聞獻捷凡在區宇孰不歡呼中謝臣每讀邸報方樂  
時平已蜀久安邊隅無事防秋戍卒忽自叛違禦侮  
出師已聞翦滅由天遣之助順見聖榮之無遺伏惟  
崇文廣武聖明仁孝皇帝陛下嗣守丕圖恭臨大寶  
躋民於仁壽之域待下以誠信之心猛士守方以恩  
威而撫馭遠人受賜同覆載之生成豈謂將校負心  
輒懷逆節據城池而僭竊勞師旅以蕩除尚望生全



更敢逃遯天施疎網豈漏凶徒陣有前鋒先誅元惡  
斷其首領奪到甲兵掃殺至多招降不少捷奏星馳  
於關下歡聲當動於域中益部山川永息寇虞之患  
蜀城父老式歌弔伐之恩仰慶昌期彌隆景運臣忝  
分朝寄介在淮濱趁玉階以無由望金門而伸悃

### 遺表

臣錫言臣聞修短之期固有定數臣子之志空戀明  
時忍死遺言瞑目長往臣誠悲誠咽頓首頓首伏望  
陛下以慈儉守位以清淨化人居安思危居理思亂  
與宗廟社稷為福與天下億兆為主臣無任感咽悲  
哀之至謹上遺表永辭聖明臣誠哀誠咽頓首頓首  
謹言

### 謝知制誥笏記

臣錫言臣伏蒙聖慈賜臣官誥一通勅牒一道特授  
臣知制誥者祇荷寵榮不任感懼伏念臣聲光素淺  
文藝非高東觀濡毫不足與史官之列西垣掌告安  
能司王者之言豈謂聖慈擢升清近演綸鳳閣慙非  
潤色之才委珮龍墀忽在論思之地敢不冰泉勵節  
緇素研幾上酬英主之恩聊舉詞臣之職

### 謝除工部員外郎笏記



臣錫言伏念聖慈賜臣官告一通勅牒一道特授臣工部員外郎者祇荷寵光不任感懼伏念臣素乏時才謬分憂寄爰因公過出佐方州未逾年逢赦量移未周歲蒙恩引見自循過咎敢望恩勞豈謂聖造矜容宸慈光被俾歸郎署復齒班行敢不進思盡忠退思補過上答乾坤之施用明砥礪之心

謝直集賢院笏記

臣錫言伏蒙聖慈賜臣勅牒一道令直集賢院者祇膺榮命感懼交并伏念臣學識才能不偕時彥華資顯職屢忝恩光未伸微勞復霑殊渥金殿集仙之職

玉陛近侍之榮內省庸虛益慙尸素敢不服勤儒行砥礪臣誠上酬覆載之恩永報照臨之德

謝復戶部郎中笏記

臣錫言伏蒙聖慈賜臣官告勅牒授前件官依前充職者祇膺寵命感懼交并伏以慶賜方行殊私驟及即曹念舊既承牽復之恩帝澤惟新實繫遭逢之幸伏念臣器能無取文學非優早揚歷於清華每兢慙於尸素豈期聖造寘榮班復五品之華資益知忝冒樂千年之景運彌覺光榮唯勤忠恪之誠上报照臨之德



謝皇太子笏記

臣蒙恩授戶部郎中仍舊直集賢院充職者祇荷寵光不任感懼伏念錫素無才識早玷官常爰當慶賜之辰復荷優隆之寵此皆伏蒙皇太子鴻私廣被睿德無私致粉署之殊榮爰陞賤品荷儲闈之大造徒激微誠永勵恪勤上酬覆燾

謝改吏部郎中依前直館笏記

臣錫等言伏蒙聖慈各賜官告勅牒蒙恩除授吏部郎中仍舊充職者祇荷寵光不任感懼竊念臣等器能無取文學非優遭逢既自於先朝揚歷驟升於清貫或綸闈效職或史閣榮名但貽尸素之譏未展涓埃之報今伏遇陛下嗣登寶位光啟鴻圖普覃雨露之恩仰荷雲天之澤

謝改賜章服笏記

臣錫言臣蒙恩改賜章服祇荷寵光不任感懼伏念臣素無文藝本乏時才遭逢既自於先朝揚歷驟升於顯秩忝塵斯久報效未伸每愧貪叨但慙尸素豈謂聖慈曲被寵命惟新象簡朱衣念其久賜金章紫綬錫以增榮唯勵丹誠上酬玄造

謝充彭城郡王生辰使笏記



臣錫言伏蒙聖慈差押賜彭城郡王生辰例物者祇膺睿旨感懼交并伏念臣早受聖知累塵近職內連差使未踰渙旬王邸誕辰復令將命荷稠重之渥澤循省難勝承睦注之光榮兢慙愈切

謝兼侍御史知雜笏記

臣錫言伏蒙聖慈賜臣官告勅牒授兼侍御史知雜事祇荷寵光不任感懼切念臣才能無取齒髮已高列軒墀每慙尸素忽沐涵濡之澤遽塵端副之榮矧以申明典章必資諳練故實循聞懦寧振起於朝綱仰玷選掄但徬徨於官次敢忘勤瘁上荅休明

謝改諫議大夫笏記

臣錫言臣伏蒙聖慈賜臣官告勅牒授臣右諫議大夫散官勲封賜如故者祇荷寵光不任感懼伏念臣遭逢景運揚厯官途慙無絲髮之微勞上荅君親之大造豈謂天恩曲被宸睠猥臨寘諸侍從之班授以箴規之職弥憂官謗止候聖知敢忘獻替之誠上荅照臨之德

謝覃恩笏記

臣錫等伏蒙聖慈各賜官告勅牒改授官資祇荷寵光不任感懼伏以千年景運慶賜方行五品華資非



才豈稱唯勵忠勤之節上酬覆燾之恩

二

臣錫等伏蒙聖慈各賜官告勅牒改授官資祇荷寵  
光不任感懼臣等遭逢英聖塵玷清華當榮勳行賞  
之辰荷稱物無私之澤或超陞顯秩或牽復舊官省  
循咸愧於非才報効敢忘於盡瘁唯勤忠恪上答文  
明

咸平集卷第二十五終

咸平集卷第二十六

京兆田錫

奏狀一

謝卹刑

右臣今月二日遞中伏奉勅書以蒸暑之時條理刑  
禁并賜臣優詔勉喻者纔臨畏景遽軫皇慈仰瞻貫  
索之文刑章已措俯閱出綸之命王道彌光伏念臣  
職忝分憂任當求瘼上體哀矜之旨敢忘勤瘁之心  
固圖潔除飲膳供給湯藥必蠲於疾苦水漿用滌其  
煩蒸每務躬親不至淹滯仁主好生之德既已昭彰



微臣述職之誠唯增恭恪臣已畫時錄勅施行訖

二

右臣今月二十五日遞中伏蒙聖慈賜臣勅書一道以時及鬱蒸恩隆軫惻丁寧諭卹刑之旨慮有滯淹撫問承出綽之文彌增惕勵臣竊念早塵睿鑒擢在掖垣每畏景之纒臨觀舊章之必舉哀矜之意既得代言欽卹之詞亦曾起草况今自為長吏恭布詔條導俗宣風固當已任親民聽訟但守公方仰分宵旰之憂未展涓埃之効敢不屬因炎暑更切專勤疾病者湯藥必供縲絏者飲食無缺掃除禁室置給水漿重囚則無至淹延輕繫則逐旋踈理浹日常親於慮問園扉迨及於空虛上酬委任之恩共慶長羸之令仍尋錄勅散下管內施行

三

右臣今月十七日遞中伏蒙聖慈賜臣勅書一道以炎蒸之時下欽卹之詔凡守官次祇奉朝章始聞命於哀矜次符恩於撫問愧抃交切循念尤深臣本非強明屬當委任自分竹使再歷晦時慙無安撫之才仰副憂勤之旨當赫日可畏南風正薰敢不上體皇恩俯遵時令小大之獄豈但躬親夙夜在公不令淹

二



滯至于飲食充給囹圄潔除或水漿滌其煩蒸或湯藥療其疾病已有先勅編下有司謹當宣布詔條勤卹人隱協天地長羸之令應帝王軫惻之仁

四

右臣今月二十六日遞中伏奉勅書為卹刑獄兼蒙恩獎諭者伏以天道運行既當炎暑皇慈軫卹諒協長羸慮庶獄之滯淹憫縲囚之困苦出綸之命務在矜寬解網之仁孰不感戴臣忝分憂寄恭守詔條敢息躬親免辜委任訟達聽斷雖愧通明園扉禁留常勤決遣况刑清事簡運屬升平令肅恩寬人無枉濫皆聖主慈仁之所及豈微臣政理之可求丹詔遙臨特諭哀矜之旨黃沙既啓盡承欽卹之恩臣尋依勅命散行管內訖

五

右臣今月十三日遞中伏奉勅書以候及長羸時當炎暑獄訟之理既上軫於聖慈撫問之恩亦下及於凡品俯俸披閱虔恭奉行况宣導化風臣之職分躬親刑政敢忘專勤重輕禁繫之人無至淹滯供給潔除之事不住指揮仰副詔條勉遵朝旨順時布令合大道之昭明矜罪卹刑暢物情而舒釋人歸帝德舜



詠南風之薰身係使符思歸北關之下

六

右臣今月二十四日遞中伏蒙聖慈賜臣勅書一道  
令疎理刑獄兼加撫諭者伏以南風之薰舜絃方奏  
北關之下漢詔爰行既自迓而陟遐協順時而布令  
當天道長羸之際推帝心欽卹之仁方國咸周共體  
哀矜之旨園扉所繫盡承疎理之恩玄象夜闕貫索  
驟稀於星彩丹書曉讀出綸俄自於日邊臣認以頌  
守六條躬親庶獄但仰泣辜之德慙無聽訟之才唯  
勵恪勤庶無滯滯夙興夜寐虔遵明慎之文事簡刑

清唯樂升平之運

謝賜冬衣

右臣今月十三日祇候內品任延保到州伏蒙聖慈  
賜臣紫紵正縣旋襪一領并勅書撫問兼賜屯駐本  
城諸軍負寮等衣襖已准宣俵散訖伏以江國祁寒  
之際金門慶賜之初瑞雪纔飛早梅方拆俯閱出綸  
之詔拜手知榮跪承挾纊之恩撫躬增感竊以臣忝  
分憂寄豈著微勞揮涕淚以霑襟寧酬玄造對衣裘  
之在笥益勵丹衷

二



右臣今月二十三日教閱內品林延壽至伏奉勅書  
賜臣紫散正縣旋襪一領兼賜屯駐本城負寮衣襖  
已准宣俵訖歡呼拜恩俯僂跪受詔以出綸之命宸  
獎難勝頌之在筭之衣戎容共悅伏念臣久違近侍  
繼忝分憂美服為榮敢忘益恭之訓撫躬知感寧酬  
慶賜之恩

三

右臣今月四日翰林待詔王祐至伏蒙聖慈賜臣勅  
書一道勉諭并賜紫散正縣旋襪一領兼賜就糧諸  
軍負寮等衣襖尋准宣俵散訖伏以祁寒之節初戒  
於霜嚴慶賜之恩普覃於天下守方猛士衛社勲臣  
宜挾纊以頌宣表出綸之渥澤臣忝分朝寄叨布藩  
條慙無襦袴之謠亦荷衣裘之賜俯伏拜慶歡呼戴  
恩喜動連營春色先歸於細柳職拘守土夢魂徒繞  
於禁林

四

右臣正月二十八日翰林藝學光祿寺丞郝承惠到  
伏蒙聖慈賜臣紫散正縣旋襪一領并賜勅書撫問  
兼賜負寮衣襖已准宣俵散訖臣忝分憂寄未展微  
勞爰及祁寒例霑慶賜俯僂聽出綸之命歡呼承在



笥之衣禮厚頒裘省躬靡稱恩深挾纊撫已難勝唯  
堅忠恪之心上報照臨之德

五

右臣今月八日使臣後苑打球祇候三班奉職張珏  
押衣襖到伏蒙聖慈賜臣勅書一道并紫歛正緜旋  
襖一領及軍負冬衣等已依宣命俵散訖伏以祁寒  
初戒慶賜咸均星使降于禁闈時服頒於郡國切以  
臣素無才術叨奉詔條歲月再周勞効未著承出綸  
之問諭荷挾纊之恩榮捧闕而既覺難勝束帶而益  
知靡稱歡呼就列拜聖君臨照之私感激于懷愧微  
臣尸素之幸敢不恪居官次慎守公方冀伸絲髮之  
微勞上答君親之厚施

六

右臣今月日秋官正趙昭益到州伏蒙聖慈賜臣勅  
書一道撫問并紫歛正緜旋襖一領者伏以祁寒初  
屆慶賜遂行天人降自於禁闈時服頒宣於外郡臣  
忝分憂寄恭守詔條愧無勞能亦荷寵錫俯樓閣出  
綸之詔歡呼承挾纊之恩輕暖在躬禦風霜之凜冽  
兢慙省已霑雨露之涵濡唯勵丹誠上酬玄造

賀德音



右臣今月三日夜密院馬遞到勅書一道以炎蒸時  
序推恩既表於哀矜輕重刑名布令普行於減降已  
畫時散下管內施行訖照臨之內歡慶畢同伏惟皇  
帝陛下道洽泣辜仁深解網四時合序蕤賓方戒於  
長贏萬物勞懷庶獄先憂於枉撓至于言刑罪已念  
切向隅微無納者悉與蠲除杖已下罪特令免放動  
天以德仰瞻而貫索星稀感物以誠解愠而南薰風  
至臣忝頌條詔已踰歲時愧無微勞上答玄造每遵  
朝旨罔罔靜而屢空方樂時康刑法措而不用

二

右臣今月十三日遞中伏奉德音應見禁罪人減降  
決遣者陰陽之數允早有時聖哲之心宵旰為念慮  
科條之尚密致刑罰之未平爰以深春稍愆甘澤遂  
降哀矜之詔用彰軫惻之仁遞減重刑俾從輕典人  
心感悅和氣舒以雲行天意昭彰玄貺流而雨施宣  
勅之日尋有霽沍播種之時悉得霑足仁主好生之  
德變沴為祥蒸民受賜之心式歌且舞臣課膺朝寄  
恭守詔條夙夜在公敢忘惕厲躬親庶獄常慮滯淹  
絲綸爰降於矜寬縲紲盡除其禁繫幽鑰夜動圜扉  
曉空睿德所覃大賚斯普仰稟憂勤之旨俯增尸素



之懷臣尋依勅施行訖

謝賜曆日

右臣十二月二十九日遞中伏蒙聖慈賜臣宣頭一  
道雍熙四年曆日一軸者伏以堯帝授時之典周官  
頒曆之儀君命先春感嶺梅而盡拆王正告朔催江  
柳以俱新伏念臣叨守六條已更三載俯閱履端之  
始豈勝慶賜之思

二

右臣今月十二日伏蒙聖慈賜臣雍熙二年曆日一  
軸仍降勅書撫喻者臣久違近侍方忝分憂律曆頒  
行俯僂拜授時之賜絲綸問念歡呼馳就日之誠榮  
抃交并不知所措

三

右臣今月一日進奏院遞到宣頭一道賜臣淳化二  
年曆日一卷者伏以皇明示信帝德先春頒寶曆以  
授時平分四序表瑤圖之撫運永慶千齡拜受捧闕  
省躬知感臣忝膺朝寄方布藩條讀汜氏之農書合  
周公之時訓勉人耕作欣節候以無差與眾頒行見  
陰陽之不忒豈煩闕牖天道已知徒限剖符宸階尚  
遠



右臣今月十九日伏蒙聖慈賜臣咸平三年曆日一卷者伏以日官供職既遵守於舊章王者授時遂頒行於新曆履端於始舉正於中三百六旬七十二候開卷有得俾人不迷慶賜所均先春而至臣忝分憂寄恭守詔條黎元是親勸課為本紀候昭著與農書而共披陰陽運行同聖德之廣被仰膺玄造豈勝丹誠

右臣今月四日進奏院遞到宣頭一道伏蒙聖慈賜臣咸平四年曆日一卷者伏以星迴于紀月周于天堯仁既則於上玄禹服遂頒於新曆臣才非典郡任重親民披分至啟閉之文知勸課撫綏之節所念一違天關三換王正寒暑往來鴻雁遂隨陽之性草木萌動葵藿有向日之心萬國授時拜閱但欣於慶賜明堂讀令禮儀空羨於榮觀

進賀聖節

右臣伏以千齡應運萬國同歡彩虹流渚以呈祥率土克達而執贄前件縮出從公帑入貢宸階用馳北關之心仰祝南山之壽謹差某乙押領上進干冒旒



辰

二

右臣伏以虹流華渚電繞辰樞凡居率土之濱咸祝  
後天之壽前綰出於公帑貢入明廷遇千年慶誕之  
辰同四海歡呼之志謹差某乙押領上進干冒宸嚴

三

右臣伏以上帝垂祥聖人誕慶當紫氣充庭之日是  
黃金為壽之辰况祝堯齡皆循禹貢前件綰賦租所  
入京國上供願同率土之濱用慶後天之算謹差某  
乙押領上進干冒宸嚴

四

右臣伏以承天嘉節誕聖良辰凡居禹貢之封疆盡  
祝堯仁之富壽前件綰邦民租賦國帑貯留用充貢  
奉之儀以表虔恭之節謹差某乙押領上進干冒宸  
嚴

代宰相謝社日宣賜

伏蒙垂慈宣賜酒食饌餅等仲陽嘉月主社良辰錫  
御府之酒漿頒大官之餅餌祇受愧惕感戴交深捧  
觴雖對於堯樽借箸未伸於漢殿徒積素餐之責豈  
勝推食之恩臣等無任惶懼激切之至



謝除姪男昌裔連水主簿

右臣今月二十一日伏蒙聖慈賜臣姪男昌裔官告一通勅牒一道授將仕郎連水軍連水縣主簿者雲天之澤俄及於私途綸綍之恩遽加於猶子顧微勞之未展慙內舉以非宜况茲叙蔭出身本因覃慶起家入仕固無他能但以臣解演誥之職司荷頒條之寄任遂拜章以陳乞方積憂虞蒙宸旨以曲從特與除授里閭之內一家增榮骨肉之情聚族知感矧於近地効此初官覃邑之間公事不少敢不丁寧訓勵重疊諭言俾將冰蘖之心上報君親之施

謝加朝散大夫階

右臣今月八日進奏院遞到勅牒一道蒙恩加朝散大夫者國家以因時覃慶與物惟新勲階敘進之恩本酬殊効雨露無私之澤亦及微臣祇荷寵光豈任感懼臣竊念素無文學驟忝掖垣遭逢致身實知玷幸出入受命徒罄忠勤方解職於綸闈俾頒條於藩閫階銜轉改名品遷升益為按部之榮弥勵履冰之節

謝賜御製雪詩

右臣伏蒙聖慈宣示御製雪詩者伏以聖德動天累



副憂勤之念嘉祥降雪已彰豐稔之期睿藻俄新抒  
妍詞於歌詠宸慈曲被俾凡目以闕觀拜捧增榮歡  
呼失次伏惟皇帝陛下道超三古功冠百王日覽萬  
機躬親庶政朝廷之事無不允釐天下之民已臻至  
化然五行常數稍致亢陽九年之儲素有豐備而陛  
下勵精益切求理彌深以至引咎肯以在躬走禱祠  
於羣望聖心如是天鑿聿章雲觸石以朝隣千里同  
色雪纘紛而夕降盈尺呈祥宿麥咸滋大田斯溥三  
農相慶於閭里百穀將詠於京坻是以感允悅於宸  
衷炳乾文於御唱白雲之句固莫繼於菁英黃竹之  
歌豈可侔於藻麗攸宜祕之瑤檢播以鈞天永新二  
雅之音式茂載歌之作臣素無才識忝備掖垣紫微  
紅藥之司已慙非據白雪陽春之曲受賜難勝

進瑞雪歌

右臣忝分憂寄祇守詔條勸課農桑宣導風教臣之  
本職敢不專勤臣實非才豈忘惕勵上頌聖德下奉  
朝章所以獄訟稍稀公事亦簡禾稼大稔封部無虞  
唯自入冬尚未降雪蓋明年有閏節氣較遲宿麥未  
妨農候不失竊聞深軫聖慮徧令禱祈果動天心聿  
彰報應當州今月十一日已得時雪將表年豐遠近



之間必獲霑足豐穰之瑞所宜詠歌臣早以非才擢  
在清貫因思去歲亦是深冬六出呈祥方覩盈尺兩  
制同列俄受急宣俾於中書錫以良會上樽賜酒光  
祿移厨聖製歌行初蒙陛下宣示御筵賦詠亦令臣  
等進呈白雲黃竹之謠豈憂稼穡君唱臣和之美堪  
載榮書臣亦親聞德音願歌茂實今以大蜡之月佳  
雪及時撰成葑菲之詞上黷冕旒之鑒干冒宸宸

進瑞麥

右臣伏以聖德所感和氣發祥既表異於來麩實殊  
常於合穎豐年為瑞靈貺有歸伏惟皇帝陛下德合  
二儀仁深萬彙薰絃在御應朱明長養之時秀麥乃  
登彰玄造豐穰之理瑞圖所載信史可書既獻自於  
西疇合貢之於北闕臣職叨長吏任重親民躬覩慶  
靈豈任抃蹈謹差押衙云：

進賀南郊

右臣伏以聖君纂嗣諒陰之制爰除景運升平郊祀  
之儀遂展凡居率土咸貢明廷前件綰邦民樂輸公  
帑所積用慶禋宗之禮冀伸贊幣之誠謹差某乙奉  
狀上進干冒宸嚴



咸平集卷第二十六終

三

咸平集卷第二十七

奏狀

進應制詩

京

兆

田

錫

右臣昨日閤門奉傳聖旨宣召赴賞花曲宴者伏以  
農辰美景錫宴追歡仰承明聖之恩方屬升平之運  
詩稱在鎬豈足擬於皇猷歌有橫汾安得侔於盛事  
竊念臣器能無取文學非優早塵侍從之班屢赴深  
嚴之召每惟微忝常積兢慙美盛德之形容達微誠  
之慶抃欲陳歌詠上躋冕旒限以閤門曾受指揮不



許進獻文字今屬上林春曉內苑花新汎蘭酒於堯  
樽詠栢梁於漢殿雖芳叢應制金渚裁詩慙非敏妙  
之才但抱怔忡之思數日前輒嘗賦牡丹詩賞花詩  
賞花釣魚詩釣魚詩因得盈編皆金門應奉之詞悉  
丹禁芳菲之景不敢藏秘是用進呈與今日奉宸旨  
所賦詩同進歌時樂聖爰因侍宴之辰比興緣情蓋  
受言詩之賜干冒嚴宸

謝賜九經書

右臣當州為無經書乞自辦紙就國子監印取九經  
歸州今月若干日伏奉勅牒蒙恩却給還紙特宣賜

九經書并釋文者伏以聖人之道著在典墳英主之  
思頌于郡縣是使桐廬陋壤化為禮義之鄉釣瀨遺  
民永習詩書之訓伏念臣忝分憂寄權守詔條文翁  
勸學之風慙無祖述宣父化民之道敢怠師資是以  
輒貢封章乞印經籍上干旒冕方憂典憲之誅俯降  
絲綸特允芻蕘之請賜書湖外文明益播於頌聲函  
丈席間問學驟新於玉澤佇俟緘之緗帙寔彼賴宮  
鄉校請觀咸遂傳經之志郡人傳寫免勞閱市之勤  
仰荷殊恩永為盛事

乞住連水軍寄居



右臣近蒙恩澤量移單州榮慶之懷尋具表章稱謝  
行邁之次輒有哀懇披陳臣昨離海州今至連水訪  
聞綱運稍併河道未通孤舟深憚於沂流盡室復當  
於畏景乞從私便須至上言進退憂虞不知所措夙  
夕循省豈合徵求但以君親之恩所祈或遂日月之  
照洞鑒無遺臣素以寡貧又無兼力所到之處既闕  
人船出陸之時仍乏鞍乘欲乞且寄連水以俟後時  
郊裡庶令親屬之間稍遂便安之望干冒旒宸

謝許連水寄居

右臣今月十四日伏覩勅下連水軍伏蒙聖慈依臣  
所奏為乞於連水軍暫住以俟後時郊裡兼蒙恩便  
於連水軍請給料錢者臣伏念請求之懇雖上達於  
天聰憂惕之心慮有煩於聖聽方虞罪戾難逃鈇鉞  
之誅豈謂允俞俯降絲綸之命加以天慈曲被月俸  
仍霑卹其羈旅之人遂以便安之志省躬懷感聚族  
知恩白日近於帝鄉舉頭雖見滄波遠於魏闕回首  
猶賒恭俟鳳曆三周雞竿肆赦已遂量移之例該  
牽復之恩當補過以輸忠真酬恩而展效

謝姪男昌裔加階

右臣今月十六日遞中勅牒到臣姪男前連水主簿



昌裔蒙恩加文林郎階者伏以禮畢園丘慶覃方國  
自天之澤既霽霈於寰區猶子之榮遽轉加於階級  
先生里巷寵浹私迓載惟枝葉之親得與簪纓之列  
舉家知感聚族為榮難酬覆燾之恩徒訓廉勤之節  
臣昨因謫宦已遂量移尋蒙聖慈許寄連水忽覩絲  
綸之命榮慶既同但傾葵藿之心歡呼所共

乞直館

右臣輒披丹懇上黷宸嚴進退憂虞難逃罪戾寔貧  
困迫須至敷陳伏念臣遭逢盛時際會英主謬因文  
學悞受聖知塵忝既深驟列演綸之職勞能莫展豈  
伸報國之誠迨至授以正郎委之近郡時才闇懦有  
孤委任之恩公過謫遭旋遇厖鴻之澤洎歸丹闕復  
賞通班尸祿曠官弥深惕懼陳力就列將贖貪叨伏  
乞聖慈俯垂照亮念臣曾備負於東觀嘗寓直於西  
垣願伸撰述之微勞上紀文明之盛事干冒旒宸

奏魏廷式封駁

臣今月二十六日受實封勅一道為魏廷式封駁陳  
恕等不赴晡臨還司勅其奏狀云臣與田錫同共取  
旨其田錫妄奏聖君遂相矛盾臣奉聖旨令獨署名  
銜駁奏奉勅宜令田錫詳所奏分析聞奏右臣昨二



十二日於長春殿與魏廷式進呈劄子臣未讀劄子  
先奏稱魏廷式將劄取聖旨魏廷式遂將三司鹽  
鐵使陳恕等不赴晡臨斷了還司勅對御披讀又將  
刑統第一榮於御前讀曰禮者恭之本恭者禮之興  
故禮運云禮者君之柄所以別嫌明微考制度別仁  
義責其所犯既大皆無肅恭之心故曰大不恭於是  
臣遂奏云御史中丞李惟清所奏元無大字祇稱有  
此不恭陛下遂取刑統看并看元勅臣又奏大不恭  
有八條臣又奏曰臣按故事凡制勅有未允當即駁  
正其事封還詔書謂之封駁今此勅已斷遣了臣又

奏臣昨日與魏廷式商量此勅緣是斷了勅然不敢  
堅執緣張鑿是臣親情慮魏廷式有所疑今日須至  
於陛下當面敷奏臣又奏曰臣於法律不熟魏廷式  
本是法科成事臣乞祇令魏廷式自駁奏尋蒙陛下  
謂魏廷式曰祇卿獨自駁奏又再謂魏廷式曰卿自  
駁奏臣又奏曰魏廷式欲法寺定斷元條若陛下寬  
減其罪所貴恩歸陛下臣之所奏陛下必一一記得  
今魏廷式稱臣妄奏聖君所奏安敢輒妄魏廷式又  
稱臣遂相矛盾臣緣所見與魏廷式所見不同所以  
不敢與之同駁奏以此魏廷式奏臣遂相矛盾臣與



魏廷式同勾當審官院通進銀臺封駁司豈敢與之  
矛楯若魏廷式所見與臣所見同即臣方敢與之同  
封駁若魏廷式所見與臣所見不同即臣豈敢與之  
同封駁臣謬因文學偶忝科名幸以遭逢驟塵華顯  
効官吏閣但閱圖書供職掖垣曾知制誥典謨之事  
則嘗聞之刑律之書未嘗學也昨八月八日閤門受  
勅差臣與魏廷式同職勾當敢不盡忠於陛下敢不  
共力於同官實非妄有奏陳輒相矛楯仰祈聖鑒俯  
察愚誠

泰州謝上

右臣昨奉詔旨差知泰州已於今月五日到任上事  
訖伏念臣素無才術驟歷官常先帝悞知寘之外制  
陛下擢用列于內廷臣每憂致踈遺慙無裨益難進  
易退輒效古人量材授官因告明主遂有狀奏乞歸  
館中兼以太祖史書久未了畢集賢職分願効勤勞  
豈謂聖意丁寧憂寄差使出令典郡委以親民告謝  
之時既叨敦喻入辭之後仍有所陳遽荷殊恩累降  
中使再蒙召對復得頒宣仰戴恩光實踰始望恪守  
官次敢不盡忠自至臨行合有所奏爰當發日曾上  
實封竊計愚誠尋達睿聽臣識見素淺年齒已衰惟



陛下以特達知臣唯臣以愚直奉陛下兼因宣召面  
奉指揮候到本州若有公事或入遞申發或赴關奏  
來臣實何人驟承宸睭况外郡以常行之事自素有  
定規若舊勅有未便之條必奏取進止臣乍違嚴宸

秦州乞替

右臣輒披丹懇上黷皇明仰祈臨照之恩俯鑒憂虞  
之抱臣至道三年蒙恩差與魏廷式同勾當審官院  
通進銀臺封駁司事因魏廷式奏三司使陳恕已下  
犯大不恭罪為所奏與御史中丞李惟清所奏不同  
臣所以不敢同其所奏自是魏廷式與臣不知以

此上章乞歸館殿適值三館中差安德裕席希叟韓  
援宗鎬王綸李建中張復曾會樂史路振等出典州  
郡時聞聖意謂臣亦求差遣遂有勅差臣知秦州臣  
以本無意求出祇為魏廷式性識麤疎難與之久處  
臣所以先自求退乞歸館殿因詣崇政殿告乞免此  
差遣聖旨未允臣更不敢辭免遂等候春水進發未  
進發間伏覩二月五日御札以彗星見令臣下各陳  
所見臣遂於三月七日上章是日至未時宣

蒙恩以臨行時有額賜八日朝辭九日復 貝封劄  
子十一日中使至再宣召於崇政殿西閣顧問仍蒙



金口問喻甚日進發祇半年與替兼奉聖旨或有事  
要面奏但乘遞馬赴闕臣到任上事後尋發奏謝狀  
中亦略言訖蓋州郡常事可行即行不足更煩聖聽  
但憂離陛下左右之後或有讒諂所以臣不遂半  
年與替之詔臣今在任已二年八箇月三逢聖節以  
官秩未滿朝覲無由不獲隨班上壽所謂身在江湖  
之上心歸魏闕之下揮涕感戀情不能忘雖夙夜在  
公敢不惕勵而旦夕望替蓋憂踈遺兼去年曾具奏  
聞為臣男長成與即今知興元府國子博士許逖家  
結親於今年四月成迎訖緣許逖始因官在泰州居  
住臣久在任慮非穩便願歸京師且在館殿供職伏  
望聖慈允臣所奏

謝得替

右臣今月一日伏蒙聖慈賜臣勅一道差膳部郎中  
崔維翰知泰州軍州事替臣今臣候替人到交割訖  
發來赴闕者臣伏念近發奏章求解所任追思僭易  
方抱憂虞蓋以臣素無才能叨膺任使考秩將滿勞  
效萬聞雖常佩官箴敢忘惕勵而願歸仙殿庶免曠  
遺豈謂皇明俯鑒於忠誠睿德特容於上請今已祇  
受制旨恭俟替人當獻歲之令辰捧出綸之優詔俯



樓拜命歡呼戴恩路雖遠於清淮心已歸於丹闕朝  
覲在即榮慶交深

謝賜御製社日詩

右臣伏蒙聖慈以社節御製詩賜直館已下令依韻  
和來者伏以文照天德實炳三辰詩與道鄰合萬  
象豈臣固陋所能討論所念臣遭逢盛時伏事先帝  
歷清華之職次塵侍從之榮班或上苑花時或中秋  
月夜得與言詩之賜屢陳應制之詞雖采葑每愧於  
緣情而傾藿但承於委照今遇陛下嗣膺寶曆恭守  
丕圖以秋社之令辰慶豐年之嘉節堯樽湯鼎賜嘉  
會於館中聖藻宸篇示同歡於天下物情欣戴睿澤  
汪洋臣既就列歡呼觀皇家之餘慶省躬感泣觀雅  
道之重光敢不仰紀王猷上膺宸旨在心曰志樂三  
農豐稔之時扣寐求音頌千載會昌之運謹繕寫應  
制七言四韻詩詣通進司隨狀進呈

謝賜御製重陽詩

右臣伏蒙聖慈以重陽五七言詩二首賜直館已下  
依韻和者伏以千年嘉運九日良辰宸歡發於詠歌  
睿意屬於豐稔雲天六義下館閣以傳觀風雅二章  
與星辰而並麗臣忝竊近職仄瑄屢遷遭逢聖時塵



露無益憂慙文集節序惟新良期當采菊之辰故事  
有登高之會君唱臣和雖理道可發於詩聲金馬石  
渠而就列亦承於宣示受命兢惕捐思怔忡俯慙葑  
菲之詞豈稱絲綸之詔

進撰述文字草本

右臣昨五月八日蒙宣詔顧問之次臣因奏乞以經  
史中要切之言書於屏風寘於御座之側所貴旦夕  
披覽如座右銘之類臣又奏今陛下以何道理天下  
願以皇王之道為理臣奏舊又有御覽但記各門事  
類共三百六十卷取日覽一卷可周歲讀徧然不如

節略經史子集作三百六十卷或萬機之暇日覽一  
卷所貴理亂興亡之事常在目前也臣欲撰進至明  
日又再承旨對宣喻所言皇王為理之道可款曲著  
撰進來臣遂略言尚書堯舜典是帝道其注亦甚分  
明陛下稱朕亦常看尚書其注頗甚易曉臣又奉聖  
旨令寫先帝時所進封章臣自請假往鄭州迴尋寫  
先朝時所進封章已於五月二十六日詣東上閣門  
實封進呈訖所有撰進文字兩本隱其名今且各寫兩  
卷進呈取進止欲依此撰進如聖旨允所奏即乞內  
降劄子指揮所是餘一卷軸稍多候撰及三五十卷



旋具奏草進納今詣通進司進上件草本四卷隨實封狀聞奏

謝內降劄子獎諭

右臣昨日通進司差人送到實封內降劄子一道伏蒙聖慈特加獎諭并以臣所進文字令餘上卷帙旋撰集得相次進來者臣本無器業素乏才能遭逢先朝驟歷華貫祇事陛下未展微勞昨因召赴深嚴再承顧問遂有所奏欲以皇王之道編撰進呈遽承英睿之知特垂聽允洎撰集之次館中將文曆令臣署名隨例勘書所撰集既密受指揮不敢洩漏其技讎又難為訴免不敢奏聞相次奉勅考試舉人昨已了畢遂進所撰草本取候進上豈謂聖恩曲被睿獎端臨退思庸淺之才曷稱照臨之德俯伏愧荷兢惶失圖今因事復有愚誠合取聖旨為所撰進文字卷軸稍多所有館中勘書欲乞蠲免貴一志得專於檢閱數年方就於功夫兼得逐旋進呈以備接續披覽仰祈立造俯鑒丹懷

奏乞不差出

右臣所撰進文字旋進五卷訖未審陛下書於屏風已寘座隅否所進文字名隱是臣致君於堯舜之心也



嘗因宣召陛下問臣所進文字幾日撰得一卷臣奏  
五日撰得一卷臣因以日計撰成之數一年計七十  
二卷五年方得成就雖五日撰得一卷然須子細披  
詳慮有差錯或悞則檢會比覆以至寫淨可七日至  
八日方了一卷今以八日之數大槩摠計一月可得  
三卷一年得三十六卷十年方得三百六十卷別隱  
一十卷不在計數外其餘已進十七卷訖餘三百四  
十三卷計九年餘六箇月方始成就臣慮十年之間  
陛下差臣出官若臨時求免差出是違王命也又慮  
十年之間陛下差臣蒞事若至時欲免差遣是違聖

旨也以臣愚見若差出一郡若留臣在館殿常以  
皇王之道致陛下於堯舜也若差蒞事不過供一職  
孰若留臣在左右得以帝霸之道致陛下於堯舜也  
臣始乞免勘書欲專以撰述蒙聖恩尋有內降劄子  
下館中矣臣又乞借書欲廣於聞見亦得審旨尋有  
內降劄子下館中矣臣既有書檢閱又無事牽束以  
副陛下降綸言獎喻之恩足以成微臣奉聖旨著撰  
之志今陛下春秋鼎盛英睿天資聽政之餘好古不  
倦若師皇王之道日新厥德必十年之內能致太平  
若遵帝霸之道夕惕若厲則千載之運永固鴻業臣



雖衰邁得見太平之時臣之私幸足矣臣雖愚蒙得  
成所撰之書臣之夙願亦足矣如聖慈允臣所奏乞  
御批劄子直付微臣貴無洩漏緣所撰書未成須至  
慎密庶免譏謗也干冒宸嚴

奏蔭長男慶遠

伏以皇家積慶聖主誕生當斗樞繞電之辰咸思祝  
頌仰日馭葵傾之際輒披陳願垂臨照之恩實荷  
生成之德伏念臣迺惟羈旅年已衰邁忝冠部曹叨  
兼憲署風霜舉職愧未展於臣誠雨露均恩因仰祈  
於子蔭臣有長男慶遠切嘗訓勵今已長成遇華封

祝壽之時起宗嗣奉先之念乞該恩例願在官途冀  
微臣告老之年得嗣子及親之祿伏望陛下俯垂睿  
鑒恕以物情牛畜有舐犢之心鳥鳥懷反哺之性以  
臣子僭望式君父推恩進退憂虞不遑寧處干冒宸  
宸

右臣伏以忠於國莫先於至公孝於家莫重於繼世  
臣去年因逢聖節輒露私誠以六典素有明文五品  
得用資蔭遂上言長男慶遠幼能寫字長好讀書隨  
臣出入為官見臣日夕蒞事頗知畏慎稍識公方雖  
文學之間未能應舉而恭謹之性足以幹家臣以年



齒已衰生涯未有除俸祿充給之外無田園終老可歸慮一旦云亡卜葬無地一家私屬失所可憂遂拜封章與長男希求入仕及經旬月聞正郎無例該恩然臣男慶遠自來與臣寫所奉封章與臣寫所進文字早已成立性亦恭勤欲及臣未死之時聊慰臣有後之意望不俟聖節不俟郊禋乞陛下垂特達之恩遂微臣懇求之請况臣年六十有三餘七年當已致仕以人生百歲七十者稀未知七年之間得事陛下否若一旦溘如朝露永謝明時則遺表進男亦無及矣臣不避罪責因悉敷陳伏望聖慈俯垂憫念干冒

宸扆

謝傳宣

右臣昨日中使至伏蒙聖慈傳宣昨日所上表朕已知令安心著述文字必不別有美妾者伏以王命猥降睿旨密宣既聞命以兢榮益省躬而愧惕切以臣遭逢景運忝竊居多欲報殊私消埃未效念尸祿素餐之責靡所遑寧因聖恩召對之時輒有稟覆欲以管闕之見采撫羣言庶期日覽之時發揮古道資帝堯欽明之德副虞舜好問之心退思學識非精見聞未博以檢閱須備非三館固難得書以卷帙稍多非



十年豈易絕筆是以輒陳私懇上黷宸嚴方懷憂懼之心未寧丹素忽有宣傳之旨曲賜允俞感君親獎激之恩成臣子撰修之志供集賢之職雖愧古人戀承明之逢豈憂外任天顏咫尺五日一與朝參聖運升平十稔得終事業守官次莫榮於此受聖知莫幸於斯

知雜後謝傳宣

右臣十六日中使至傳宣旨近者覽卿章奏恐有住滯為趙誠信差出勾當不欲別差人來卿自來章疏所司不敢住滯並摠收得今日所為除改事此名位

朝廷甚難其人亦不妨撰述慮少暇可慢撰述候及卷數進來但安心勿過慮或有所見逐旋聞奏不欲召卿兼今後不更差人并降劄子去與卿便穩及今後奏狀不要可漏子上更著白帖子言裏面有貼黃卿自來奏狀朕一一親覽但祇狀內著黃貼子者俯伏聞命釋愚臣危懼之心兢榮失圖感英主照臨之德臣蓋念於通進司每下奏狀執政間或有採人古謂禁闈有九重之嚴中堂喻千里之遠蓋虞左右輒蔽聰明所以下之情誠少得上達聞聽今陛下宣示以臣自來章疏所司不敢滯留臣之至愚固無可



采但以有所聞見敢不敷陳既一一盡達宸聰則區區得罄臣節仍喻臣以近所除兼職朝廷甚難其人臣實何人當茲重選將何稱職但奉至公上酬聖知以贖官謫仍勉臣以不妨撰述候及卷數進呈令臣但安心命臣勿過慮或有所見逐旋奏聞臣學識非優器能無取但以遭逢景運涓埃無報國之勞采撫羣書緬素刑致君之志撰集未畢除改忽新慮搢罪尤合先敷奏豈謂封章朝達宣旨夕傳優容同覆載之仁敦喻表慈憐之旨柏臺莅公之暇竹簡著書之餘得以阜囊上陳丹陛雖虛佇謹直無間於芻蕘而

仰鑒融明願傾於葵藿干冒旒宸

謝宣賜弟亡孝贈

右臣昨日伏蒙聖慈以臣弟喪亡特有宣賜受命纔畢中使言迴雖尋拜於奏章尚未罄於愚懇伏念臣自離鄉井頗歷星霜以歧路之阻修念兄弟之契闊豈謂私門積釁爰及連枝遠地聞喪遂陳假牒有司所奏已煩贖於宸聰就寺舉哀思頒宣於孝贈緡錢出於內帑酒醴降於上樽臣實何人遽霑優渥光生里巷禮異品倫生成仰莫大之恩存歿荷殊常之賜省循憂惕不知所裁



謝聖旨許諫事

右臣前月二十八日長春殿伏蒙聖慈宣諭臣昨所  
奏之事朕一一披覽又以其人介然別無朋黨可且  
仍舊令臣知之即不得洩漏者兼再奉聖旨有可奏  
之事但上實封以廣朕之聞見臣受命已來今已浹  
旬內省惶懼何以堪勝所念臣實何人一無識見但  
以直道早幸逢時先帝以臣遇事敢言特降勅書獎  
諭陛下以臣所進文字名隱內降劄子褒稱荷兩朝優  
假之恩實千載遭逢之幸敢不益堅夙志彌勵愚誠  
天至高雖管闚詎識於運行日至明而主測亦知其

長短今陛下嗣守大位臨御兆民博訪賢良躬親機  
務日新厥德夕惕若厲以大舜好問之意文王猶勤  
之心昭九廟垂休之靈保萬世無疆之祚臣謂蕭牆  
之外有可聞之事非因奏覆固不可得而知况於遠  
者乎清禁之中有欲見之事不因求訪固不可得而  
見况不求訪乎然為臣事君孰敢不盡忠節明主待  
下常欲聞其直言春秋日子好直言必思自免於難  
詩曰既明且哲以保其身故象繫示吉凶之微真君  
臣保始終之分所以君不密則失臣失臣者為大臣  
所憎嫌為近臣所排斥憎嫌之深者則讒搆其罪戾



而寘之於刑戮排斥之遠者則誣枉其過咎而逐之於遐荒此由不密在於君而所失在於臣也伏念臣識既凡庸性惟愚直供職兼於臺憲莅事在於獄刑固無微勞但憂獲罪若非陛下與臣為主則大臣必因事見誣故逐度所上實封皆乞留中不出蓋慮事不密而身已危矣况臣無才略安足廣陛下見聞臣之愚蒙敢不守陛下宣諭憂懼恐倍萬常情

轉諫官後謝傳宣

右臣今日中使趙誠信至傳宣昨日所進實封已收得朕赤子細披覽但安心著撰文字必不差出如要

上殿先奏來者伏以臣誠上達必憑奏牘之詞天聽下臨忽降出綸之旨俯伏聞命兢惶失圖切以臣改授官資塵忝清近志有所蓄理合備陳仰黷宸嚴方憂罪戾豈謂皇明燭察比太陽之照臨聖造優容同昊穹之覆燾憂疑遽釋歡抃交并柏臺既免於重難竹簡得專於撰述况聖朝無事阜囊虛獻替之詞諫省餘閑緡帙遂討論之志比在家修史雖遠愧於古人以戀闕著書實仰依於明主餘取上殿進止必先有狀奏聞

謝兼史職



右臣叨列諫垣又兼史職聖恩曲被私願允諧榮莫  
如之幸實多矣榮幸交集感惕弥深告謝之時雖依  
常例中謝之禮莫遂對敬蓋閤門以既該勅美內殿  
即舊無謝例臣雖已赴職豈敢寧心叨念臣近纔改  
官又乞兼職實憂冒躓自掇悔尤豈謂人欲天從遽  
降出綸之命才微識淺慙非載筆之

蓋陛下恕

以迂踈卹其衰老實在優賢之地不離近侍之班獻  
替箴規敢忘匪懈述修編撰唯守靖恭時政記得見  
鴻猷起居注式資潤色纂成日曆賡續季終異鉛槧  
之微勞展涓埃之薄効諷從五諫仰遵將聖之言運

偶千齡幸紀太平之事

### 告假謝傳宣撫問

右臣昨日伏蒙聖慈以臣有狀暫請患假特差中使  
傳宣撫問兼依允所奏不美醫官者伏念臣拙於脉  
理昧於攝生致久病未安服餌少効豈謂聖恩之軫  
惻俯憐疾苦之纏綿雖自來內殿起居不敢許免因  
昨日隨班舞蹈頓覺衰羸以此須至上言仰干睿聽  
犬馬之疾既醫治君親之恩曲加勉喻情有所感  
不覺涕零

奏蔭次男慶餘



右臣伏以千年慶誕之辰萬壽延長之日臣輒披丹  
素上告慈仁臣男慶餘訓以詩書教之忠孝幸因聖  
節願在宦途仰祈日照之明俯鑒葵傾之懇干冒宸  
宸

咸平集卷第二十七終

咸平集卷第二十八

京兆田錫

制誥

永清軍節度使駙馬都尉王承衍妹王氏封  
琅邪縣君

勅具官王承衍妹王氏賢明為德婉泚其儀環珮中  
於禮容蘭蕙藹其令範嬪于良族既詠柏舟茂我皇  
姻宜封石節載協雲雷之澤俾疏湯沐之封

衛州衛縣簿王光圖可衛州司理

勅具官王光圖能以公才往為邑佐恭勤足以贊宰



字廉慎可以典獄刑不離汲郡之寮俾掌理官之職  
當思盡瘁無陷非辜

三司大將加恩

勅躬耕之禮用示於勸農慶賜之恩必均於効職以  
爾等各伸勞績常夙夜以在公例援恩榮表雲雷之  
霈澤

皇城司勘契官仇延郎可銀青階兼官將東郊先

勅具官仇延郎有司上言先事列職俾靖恭於禁籍  
宜時茂於朝章假以宮賓兼之憲職冀以階資之寵

參乎儀衛之司恪奉斯恩無怠所守

端州防禦使李克文落起復依舊端州刺史

克本州防禦使

勅具官李克文明於韜畧貞以幹能弓箕克嗣於家  
聲符竹早隆於邦寄頃因禮制俾奪哀情洎喪紀以  
外除茂朝章以斯在任當禦侮寵列頒條眷惟高要  
之民實佇撫臨之政勉膺嘉命無替忠規

道州軍事推官知長沙縣趙沂可將作監丞

勅具官趙沂經術榮名宿榮從事試廷評之美職藹  
邑尹之嘉稱宜示朝恩俾陞京秩用酬勞績更勵恪



勤

朔州觀察使左驍衛大將軍趙希贊可泰州  
刺史

勅分朕憂寄頌于詔條親吾黎民行其風教惟良之  
命既難其人作牧之榮實重其選以爾具官趙希贊  
忠貞抗節毅勇存誠弓冶襲其慶靈韜鈴著于績效  
以拱衛腹心之任委察廉風俗之能邊鄙用寧惇嫠  
受賜宜膺茂賞別降璽書淮甸之邦漢符劇郡命以  
俾乂疇其允釐佇騰襦袴之謠達予聞聽豈吝絲綸  
之詔獎爾賢能佩茲訓詞予明命

太常丞張適父好問前守黃州麻城令可授

太子左贊善大夫致仕并妻封邑號

勅具官張適父好問早彰幹局之才頗著親民之譽  
克生令子為朕良臣涵濡郊祀之恩翊贊官僚之職  
宜膺慶賞仍遂優榮

勅具官張適妻王氏中饋傳芳宜家稟德女範訓從  
於和惠夫賢贊自於柔明宜膺疏邑之榮用洽禮宗  
之澤

大理司直前青州錄事參軍麻希夢可守工  
部員外郎致仕



勅具官麻希夢朕嗣位十有三載天下無事思勸農  
務本躬耕藉田改元乃與物維新發號則均人之慶  
可以行古道禮高年由是赦書有賜壽一級之命而  
希夢年過九十以伏生之經術壽考踐歷宦途而為  
廷尉屬寮兼憲府之職替郵罷秩願養于家守臣上  
言軒墀引見嘉其華皓是用旌陞榮之列宿之班優  
以懸車之秩所以表朕養老尚齒之意也

著作佐郎梁宜可舊官

勅具官梁宜儒行克脩宦途早踐嘗列祕文之府頗  
彰稽古之名禮制既終朝章可復小著清選士流所

榮勉膺綸綍之恩無忝圖書之職

知廬江縣劉寅可蒲城令

勅具官劉寅雅有才名早彰官業既茂絃歌之化宜  
更銅墨之資關輔之間蒲城劇邑往膺朝命撫我黎  
元廉明則吏屬知方惠愛則鰥寡受賜勉高課第當  
議甄升

右司諫直館王仲華監察御史潘太初等母  
封太君

勅具官王仲華母信都戴氏聖善之賢慈仁之訓克  
生令子為吾諫官朱紱彩衣足榮具慶粉田石窳未



通敏機務淹詳公望素高清議惟允則何以為時瞻  
重稱吾簡求以爾具官王明貞方特操沉毅有謀臨  
事彰適變之才奉上見盡忠之節剖竹每聞於課第  
兼襦必藹於政聲朕嘗便殿與言觀其敷奏方畧才  
用良足嘉稱宜副疇咨以旌茂賞春官峻秩可以貳  
之禮闈崇資諒無忝也爾識量既如彼而繇歷又如  
此豈煩訓告勉荷寵光

翰林圖畫待詔夏侯延祐可廬州巢縣令

勅具官夏侯延祐早以藝能列於禁署每聞恭恪克  
守官箴可以命之親民觀其莅事遂爾上章之意勿  
辜非次之恩清廉可以保躬畏慎所以無過繪事後  
素是為禮歟能達斯言必善為政

高麗使副判官等授官

勅朕以推恩示信覃聲教於殊鄰進秩書勲賞勤勞  
於將命式表綏懷之德用於恭恪之誠具官某遠自  
辰韓來朝象魏涉滄波之萬里輸職貢於九重方物  
充達達帥臣之忠節華簪就列有專介之禮容言念  
使乎宜加朝獎或紆散從大夫之後或握蘭參郎吏  
之班勲級增榮器名非假勉荷殊常之寵無忘來遠  
之恩



該邑封嘉其奉養之心特乞優隆之澤宜從子貴式  
顯母儀俾新湯沐之封以適逢闡之意

前廉州刺史陳文顯可起復雲麾將軍

勅金草從權禮典既稱於無避宜麻易制國恩宜茂  
於必行具官陳文顯器識淹深才謨明允著公侯之  
名節彰竹素之勲勞寄重圭符嘗布詔條之化禮居  
苦塊俾新綸綍之恩莫移孝以資忠表奪情於優寵

光祿寺丞前知縣州章明縣李簡能可著作

佐郎

勅具官李簡能早以公才俾權邑政而廉幹之譽聞

於使車舉奏之章達于朕聽小著清簡是命甄升更  
克勉於律身勿有孤於知己

前蓬州伏虞令盧倩可華州鄭縣令

勅具官盧倩亟為宰字備著廉勤昔國家平定於并  
汾當歧邑饋供於芻粟幹於事任尤見勞能三峯之  
間百里之政親民命爾下車推仁勸課為先惠卹是  
務俾我志子知吾任人儻聞政聲當有升獎

著作佐郎滕玄錫可舊官

勅東觀為郎佐於著作士之清選也具官滕玄錫歷  
茲美職爰屬家艱祥禫既除恩榮可復勉祇服於官



次俾允稱於朝章

前漢陽軍漢陽尉李日休可本軍司理

勅具官李日休軍壘之間刑獄尤重苟非勤幹寧應  
選差閱長吏之奏章俾正名於理掾縲紲無令於滯  
滯絲綸豈吝於甄陞

前濱州軍事判官李準可光祿寺丞

勅具官李準恪勤官業裨贊郡條在公既著於廉能  
滿秩來參於選調有司引見俾陟京寮列寺甄升勿  
孤朝獎

前守霸州大城令張守中可許州別駕

勅具官張守中朕昨藉田行慶渙汗推恩民之高年  
尚云賜壽吏之暮齒忍棄其人爾早居銅墨之資嘗  
蒞邊防之邑曠言衰邁爰此對敷特示朝恩俾升郡  
佐

密州別駕蘇德祥可殿中丞分司西京

勅具官蘇德祥早章文價實粵通儒題別乘於百  
既聞清慎俾亞司於六尚允稱甄升勉膺出綽之恩  
無忝分曹之命

光州刺史王明可禮部侍郎

勅中臺六卿之職斯為重任而設以卿亞苟非智識



通敏機務淹詳公望素高清議惟允則何以為時瞻  
重稱吾簡求以俞具官王明貞方特操沉毅有謀臨  
事彰適變之才奉上見盡忠之節剖竹每聞於課第  
兼儒必藹於政聲朕嘗便殿與言觀其敷奏方畧才  
用良足嘉稱宜副疇咨以旌茂賞春官峻秩可以貳  
之禮闈崇資諒無忝也俞識量既如彼而繇歷又如  
此豈煩訓告勉荷寵光

翰林圖畫待詔夏侯延祐可廬州巢縣令

勅具官夏侯延祐早以藝能列於禁署每聞恭恪克  
守官箴可以命之親民觀其莅事遂俞上章之意勿  
辜非次之恩清廉可以保躬畏慎所以無過繪事後  
素是為禮歟能達斯言必善為政

高麗使副判官等授官

勅朕以推恩示信覃聲教于殊鄰進秩書勲賞勤勞  
於將命式表綏懷之德用於恭恪之誠具官某遠自  
辰韓來朝象魏涉滄波之萬里輸職貢於九重方物  
充達達帥臣之忠節華簪就列有專介之禮容言念  
使乎宜加朝獎或紆黻從大夫之後或握蘭參郎吏  
之班勲級增榮器名非假勉荷殊常之寵無忘來遠  
之恩



高麗職負軍將等授官

勅具官某等列外區之右職達主帥之明誠遠涉滄溟  
底其方物載念恭勤之節宜隆旌賞之恩冀府華  
資儲闡美秩加以參六勲而示賞表重險以懷來無  
忘訓激之詞益勵忠貞之操勉膺鳳綽歸耀雞林

禁軍將校授官

勅具官某軍旅之事朕所悉知殿廷之間今自訓閱  
至於將校例有甄酬習兵鈴韞武藝是爾之事業捍  
邊鄙為國家是爾之曾襟此時立功與吳展効言念  
於爾無後他人俾升遠郡之榮仍列親軍之職

勅具官某職効和門班升禁旅早習訓齊之令素章  
勇敢之名言念勤勞特加旌賞部外遷於騎籍朝  
思無忝於龍綸勵乃忠誠膺吾嘉命

勅刺舉之任恩寄非輕廉察之權寵章則峻具官某  
氣惟驍勇志則忠良禁連居列校之班武畧負兼人  
之藝聞蕩寇則詞意慷慨能處衆則禮貌恭和為吾  
武臣深協時論自升守土仍著風謠雖竹符以遙領  
之榮而襦袴有來蘇之詠今則方當蒐乘屬在誦兵  
擇其將領之才副我旌求之旨必增賞秩用壯宣威  
名器昭其材能車服榮於廉問服我休命爾其念之



勅朝廷武備雖在擇人爵服恩加實期報國况以廉  
車之秩列于禁旅之班苟非簡在朕心何以副於公  
議具官某忠能有勇智則多謀韞金石之明誠稟風  
霜之勁氣而能以和處衆以禮事君自錫寵於圭符  
聞載歌於襦袴今國家爰因蒐乘將務平邊念既屬  
於貞師命宜隆於出綽委以察廉之寄寘于親侍之  
行盡爾忠謀膺吾異獎

勅車服之榮固不虛授軍旅之賞亦不徒施或先其  
勞所以悅使或後其報所以酬勲具官某列在親軍  
職為諸校有謀有勇盡節盡忠夙夜見其公勤委使  
諳其敏幹或帶專城之貴或居練武之權章綬在躬  
圭符領郡雖為榮達更議甄升宜加魏闕之恩可布  
漢條之詔俾遵要劇仍委察廉

勅親軍之職廉郡之榮藉貞純果毅之臣副委用勲  
勤之寄具官某名因勇立節以忠聞明誠恪事於君  
親銳氣誓平於戎而况早經任使著勞能識兵  
謀之卷舒習陣法於奇正若委之集事必能守今  
命爾之察廉居吾之三將佇伸報効用答恩榮  
勅君賞臣以爵秩下報上以勲庸存諸典章謂之名  
器具官其志懷忠恪節驟矜修嚴乎師律之貞深得



武經之要自居親衛弥見公勤苟隆渥之未加於念  
勞以何有特命察廉之寵用於優異之恩

前資州內江令鍾文拯可黃州黃陂令

勅具官鍾文拯爾以內江罷秩陽改官屬有衝除  
遽聞陳乞俾換關負之命武補選調之資牛里黃陂  
佇聞善政之任廉幹吾民實受爾賜

則將遷 遷 無所吝焉

前濟州金鄉令孫運可左贊善大夫致仕

勅具官孫運朕以躬耕之禮既古先慶賜之恩必  
加者宿爾早紆命服今享遐齡披陳臨

召見宜霈雲天之澤俾光蒲柳之年 宮坊諒

為嘉寵懸車里第足遂優閑勉思渙汗之文以協貞  
頤之吉

吏部流外銓勒留官涿州固安簿鄭德明可

陳州項城簿

勅具官鄭德明寮佐之才勾稽之職膺茲除授勉在  
恪勤儻有勞能豈無升獎

耀州司法王繼榮可邠州宜祿簿前耀州同

官尉陶化成可耀州司法

勅具官王繼榮具官陶化成一邑勾稽之任六聯掌



法之能苟非廉明寧副獎用今以繼榮佐邑理命化  
成列掾曹無忝予恩勉恭爾職

前舒州太湖尉方寧可和州歷陽令

勅具官呂文仲舉具官方寧今歷陽令闕負方求廉  
平之吏俾之撫綏而文仲稱爾理行是用命爾往莅  
厥邑苟三載考績課第頗高是文仲不認舉人而爾  
亦不悞知已也

前大理評事呂覃可舊官

勅具官呂覃孝為百行之本禮有三年之喪爾居親  
憂既去厥職今除禫制宜復舊官獄讞是思朝章勉

稱無忘聿修之訓更揚匪懈之名

前夏州節度推官王九言可宋州觀察支使

勅具官王九言早彰佐幕之才能舉鞠刑之職秩滿  
受代課第可酌睢陽詔條方藉參贊勉荷甄升之異  
渥用伸廉恪之政聲

馬守榮諸司副使

勅具官馬守榮早列班資頗聞恭謹屢膺朝委亦著  
勞能向公罔怠於夙宵莅事足彰於才識苟無勸賞  
寧表旌酬是用進階秩於明達列職司於近務更觀  
勤恪式副甄升



如京副使劉永德可濠州團練副使崇儀副  
使劉永恭可潁州團練副使供奉官劉永和  
可武騎尉唐州長史

勅具官劉永德等各榮使職或列達臣事吾軒陛之  
間雖經任用更喻內外之命式示遷除貳車之榮上  
佐之職恪謹自守循省勿忘

大理寺法直官傅珏可廬州錄事參軍

勅具官傅珏精彼刑書直于法寺三載既周於考績  
六聯宜示於陟明用旌丹筆之勞特茂紫泥之寵爾  
其表儀諸掾糾正羣司來効儻伸叙遷寧谷

衛尉寺丞張自明可右贊善大夫賜緋

勅具官張自明早以時才列于通籍嘗因左官寘彼  
京寮聞兢慎之聿修在獎升之可復青宮命秩苗綬  
采章無忘若厲之誠勉若惟新之寵

右贊善大夫知大理少卿李壽可秘書丞依  
前充職

勅朝廷以法律委廉平之士以爵秩賞勞効之人茂  
績既彰明恩豈吝以爾具官李壽參亞寺卿之職詳  
明邦憲之微課最宜旌封章自達俾陟圖書之府以  
獎前勞勉膺綸綍之恩且仍舊貫更體哀矜之旨勿



渝明慎之心

追官人韓勵已可青州臨淄簿勒停人王崇  
吉可建州建陽簿

勅具官韓勵已等早歷官途嘗因公過既聞修省宜  
復遷升各膺佐邑之榮勉贊字人之政無忝茲授俾  
飾自新

除名人宗文式可東岳廟主簿

勅除名人宗文式雖劾官常有虧家檢抵律既從於  
除免滌瑕宜示於甄升祇命嚴祠無忝勾稽之職榮  
名官路更虔如在之誠

故淄州刺史累贈太子太師李處勅可贈侍  
中

勅國家褒贈之恩臣子哀榮之典式昭故實可舉而  
行故具官李處勅忠亮事君韜鈴立節既荷葭莩之  
寵宜增漏壤之恩矧堂搆之上言冀琰詞之飾寵俾  
列珥貂之貴追酬露冕之榮貞魂有知可膺賁贈

勅停人郭文集可邢州平鄉令

勅具官郭文集頃為宰字既失競廉滌瑕宜示於恩  
榮出綽俾新於邑理勉膺嘉命以補前非

追官人吳衡可密州安丘令停官人陳吉甫



可陳州商水尉劉鼎可晉州汾西簿  
勅具官吳衡等各因遺曠追削官資既推含垢之恩  
宜復惟新之命或升宰字或掌勾稽當補過以省循  
副盡公於錄用

相州永定令李昭嘏可濮州鄆城令

勅具官李昭嘏臨蒞邑政頗著廉能部送軍儲嘗聞  
了辦洎難之試可亦勤幹以足稱既召對於軒墀  
宜踐更於銅墨撫綏勸課稱茲寵榮

太子中允御史臺推直宗錡可監察御史

勅具官宗錡憲府為寮公才稱職既茂強明之績仍

聞慰薦之言霜簡遷升勉服輝光之命臺綱整肅更  
觀糾察之能

左贊善大夫程文度可監察御史充荆湖轉  
運使

勅國家轉輸之任荆湖衝要之邦必擇周才付茲重  
委厥職既稱於縣劇改官宜陟於清華以爾具官程  
文度以文學榮名以貞固幹事嘗莅京口鬱有政聲  
俾升軌憲之班往莅汎舟之役伸爾嘉畫稱予懋恩  
儻奏課之有聞固陟明之無吝

賜中丞知貴州朱允元可國子監博士



勅具官朱允元南海列郡貴為衝要之邦爾昔頒詔  
條分憂寄而廉幹之外方畧用心嘗與轉輸播捕寇  
賊谿洞既聞於靜謐袴襦諒藹於聲光苟無旌酬寧  
示獎勸是用升爾為學官之秩亦表吾通籍之間有  
能副予委任可以為邊吏也勉膺寵命無替始終

司門郎中知福州源護可兵部郎中依前知

州

勅朝廷命南宮郎分吾憂寄而荐歷縣劇以課第上  
聞者得不時隆異獎超授名曹以勸賞焉具官源護  
早踐周行素彰公幹所至為理雅有政聲方茲念勞

懋其成績會以章奏達于聽聞予於寵榮固無所吝  
是用命爾為司戎大夫在郎署間實為華顯東冶名  
郡勉布詔條無怠初終佇聆殊効

起復如京使順州團練使石保興可落起復  
加金紫光祿大夫依舊官

勅內列近司外分憂寄委任之恩斯茂旌酌之命宜  
隆具官石保興忠諒存誠恭謙得禮克嗣弓箕之業  
頗知鈐畧之書寵之以剖符榮之以練武而能敏於  
莅事勤以奉公於貴介諸子之間無簡傲驕人之性  
嘗因在疚爰舉奪情既終制以加恩必進階以懋寵



勉荷惟新之澤無忘盡瘁之心

界歸明人張崇敏康廷弼可將軍

勅具官張崇敏朕以環列之尹翼衛之班苟非忠貞  
寧稱甄獎以爾名彰毅勇識蘊變通嘗受職於虜廷  
願輸忠於魏闕馳驅入塞既傾葵藿之心優異推恩  
宜濡雲天之澤拱宸峻秩爪牙之寄攸親事主良規  
金石之誠益固勉膺嘉命彌勵匪躬

勅康廷弼志稟忠良心明逆順恥列酋渠之職來歸  
禮義之鄉臣節可嘉予恩豈吝是用寘于拱環之秩  
摠諸交戟之班賞爾勤勞嚴朝廷之冠蓋表吾寵異

參宸極之爪牙勉思盡瘁於夙宵無忝殊常之渥澤

前果州西充尉陳文廣可陳州南頓令前秦

州清尉林思問可耀州華原令

勅具官某等民乃朕之赤子爾為朕之命官念黎庶  
之是親實慘舒之攸繫以爾尉司嚴秩俱聞捕獲之  
勞宰邑闕負命布清廉之政勉思恭慎以答恩榮

習進士李涉可宛丘簿

勅李涉文藝飾身進修為業雖月桂未題於金榜而  
縣花宜佐於銅章仍以爾父居樞近之司有義方之  
訓試爾公幹列于官途勉替親民勿忝殊渥



大名府參軍党待問可鄆州盧縣簿

勅具官党待問早居官序頗歷公途俾伸蒞事之才往佐親民之任恪勤自勵甄錄斯酬

戶部員外郎充史館修撰胡旦可知制誥

勅朕以王道致時雍人文化天下而訓誥之職侍從之臣必敷求其才簡拔精選俾朕約束言語與三代同風以爾具官胡旦學識該通筆力道健傑出多士綽有大名自中臺為郎史閣供職得春秋之微旨見褒貶之餘才然未司吾言寧滿爾志是用升于清切之禁觀其潤色之詞無令元白常楊專美前代勉修儒行以答殊恩

陳州參軍劉澤可光州司理判官

勅具官劉澤移易吏員佐理刑獄既資廉幹俾無滯留爾方自乞於劾官予即命之以蒞事勿孤獎擢更勵恪勤

勅賜同學究出身趙日用可徐州彭城主簿勅具官趙日用以爾兄作掾饒陽歿於王事存亡之念良所嗟稱昆仲之間宜加甄錄佐邑為理蒞事劾官慎守廉勤以酬獎擢

許州司法宗可觀可許州司理



勅具官宋可觀翁事郡為司法掾而長吏選擢可典  
獄刑無以丹筆之重輕而侮黃沙之鞠効往踐厥職  
勿累知人

故容州觀察使劉文裕可贈寧遠軍節度使  
勅朝廷褒贈之恩臣子哀榮之典載稽彝訓式表始  
終具官劉文裕韜畧英才公侯令德稟貞方之器識  
茂勲績於旂常自廉問宣風化條綏遠賓海著兼襦  
之詠佐時圖鏤鼎之名奄忽遽聞悼傷寧弭宜舉飾  
終之理用彰念往之懷旌節之榮藩宣之秩俾增輝  
於寔宥示追寵於明靈真魂有知欽茲賁飾

將作監丞朱澤可右贊善大夫

勅具官朱澤素曉習於科條備履詳於按牘俾差推  
鞠益見精勤敷奏之言明敏其事可茂勞能之賞用  
彰旌陟之恩勉祇命於儲闈冀增榮於閨籍

廬州慎縣尉盧顯忠可廬州合肥令

勅具官盧顯忠格令近條今火復賊殊其考課旌以  
勞能翁効官既著於廉勤舉職頗聞於屏廂宜更黃  
綬俾佩銀章爾其惠郵惇愛敦勵風俗使農桑知勸  
而輿賦及期當議獎升勿忘終始

供奉官殿直殿前承旨加恩



勅具官某朝廷耕藉之儀綸綍階升之命用均慶賜以勸勞能以爾忠於事君勤於莅事列班行而素久經委任以居多既因作解之辰宜洽惟新之寵勉成茂績以稱殊私

樞密院押衙知客李繼敏可東明令

勅具官李繼敏職隸樞機之地服勤典謁之儀言念勞能方行慶賜睠惟畿邑委以親民勉守官箴勿辜朝獎

襄州鄧城尉權知穀城縣事褚德臻可穀城令

勅具官褚德臻効公勤於尉職權宰字於鄰封二邑之民稱爾廉幹十連之帥舉爾強明俾之布政於象雷必能綏我之赤子勉致惠和之化以酬旌陟之恩著作佐郎郭堯卿可殿中丞

勅具官郭堯卿素有公才明於法律即達詳刑之旨尤彰鞠獄之能洎覩敷陳宜加獎擢俾自麟臺之秩升為御府之寮勉荷寵章無忘恭恪

御史臺孔目官門下省雜事南曹諸司勒留歸司等官可中書省主書門下省主事千牛衛長史及簿尉司馬勒留并出外縣簿尉



勅國家以耕藉之儀內外洽涵濡之命具官某等官  
曹委質公幹小心星霜備歷於勞能雨露宜均於恩  
渥省達禁衛郡佐邑僚各勵恭勤以奉俞職

夏州錄事參軍宗若拙可著作佐郎

勅具官宗若拙爾為糾掾綽有公才載披敷奏之詞  
宜懋勤勞之績蘭臺美秩小著華資勉膺獎擢之恩  
更勵恪恭之節

咸平集卷第二十八終

咸平集卷第二十九

京

兆

田

錫

制誥

諸衛上將軍宗渥等加恩

勅朕以躬耕之禮初畢於東郊慶賜之恩方行於北  
闕矧在拱環之列早彰翊衛之勲宜茂寵章以新賞  
典具官宗渥等為吾心腹列在爪牙忠貞之大節無  
渝英果之威名自得功崇社稷勲鏤鼎彝擁旄疇昔  
之殊庸出綍惟新之寵數恩光並及渥澤斯均俾增  
并賦之榮用洽藉田之慶勉膺嘉命益勵輸忠



永清彰德等軍節度使駙馬都尉王承衍男  
世隆魏咸信男亮並加階勳如京副使

勅具官某男某生于戚里為吾外孫稟明訓於義方  
昭令名於士範才能可試慶賜宜均是用加珥貂騎  
省之資帖執簡烏臺之秩茂之勳賞進以階資蒞于  
使局之名命以副車之職勉圖成效無忘寵光

河中府推官張文琇可大理寺丞

勅具官張文琇自膺朝獎往贊藩條睠惟按鞠之能  
允協察廉之政長史言薦廷臣舉揚閱稱善於衆多  
俾陟明以旌賞丞于法寺典彼刑章勉膺用翁之恩  
勿悞知人之鑒

前趙州軍州事判官李慕清可光祿寺丞

勅具官李慕清倅彼藩條幹於王事洎銓衡之引對  
俾綸綍以旌升是用擢自賓筵列于卿寺甄翁才而  
適用體予意以勤公往踐取官勿忝嘉命

前利州司戶鄭子捷可揚州參軍

勅具官鄭子捷維揚名郡命翁為參卿掾月有幣俸  
償爾前勞日無公事以爾備位儻能砥礪別議恩榮  
追官人高紳等授官

勅追官人高紳等各因譴累追削官資既當覃慶之



時宜霈惟新之澤廷評理掾禮寺京察勉勵在公思  
補前過

洪州觀察推官馮源可永清軍書記

勅具官劉掾舉具官馮源俞以公才列于賓席按章  
旌審蒞事強明廷臣舉稱是用甄獎俾掌羽書之職  
仍兼霜憲之資廷評且貫於舊銜幕畫佇聞於方畧  
儻副知己寧吝加恩

汝州團練推官前知絳州太平縣事路表正  
可河南府推官

勅具官路表正俞以賓幕之名往蒞絳臺之邑洎聞  
考課益見廉能洛師按章朝命推擇勉副甄升之寵  
更觀幹敏之才

勅賜同學究出身宗純可密州安丘簿

勅具官宗純俞父適蒞饒陽歿於王事載念公忠之  
節特隆慶卹之恩命為邑僚勉學親民之政榮其堂  
搆俾伸幹蠱之才

內班都知押班已下加恩

勅具官其朕以既舉藉田之禮方覃率土之恩矧列  
軒墀常親左右宜均嘉慶俾洽鴻私以俞等奉上之  
心無渝忠恪適時之智各韞周通夙宵匪懈以在公



事務服勤以成績爰新渥澤用示甄升或進以階資  
或榮其爵邑勉荷雲雷之寵更增班秩之榮

前著作佐郎楊巽可舊官

勅具官楊巽俞以文學之稱列在圖書之府既終喪  
紀宜復朝章與秘省之清資實士流之嘉選服勤儒  
行砥礪時才別俟恩榮以伸器業

儒州縉山簿李文益可太府寺主簿

勅具官李文益吏能廉謹佐宰邑以効官經術該通  
在玉門而侍教爰因朝慶是陟府寮詩書訓導之能  
方資師授簿籍句稽之職更試公才

起居舍人李若拙可鹽鐵判官

勅朕以管權之利軍國是資必求經濟之謀委以重  
繇之務以爾具官李若拙素有文學藹然聲光加以  
通明善於操劑珥筆軒墀之下直史是咨運籌征賦  
之能幹時攸屬勉倅銅鹽之職更觀盤錯之才

幕職加官

勅王者展藉田之禮慶賜遂行賓從列幕府之榮寵  
章斯洽具官某等咸懷器業素蘊籌謀或樽罍疊  
之談能申婉畫或牋奏翩之後俱藹聲光渥澤宜  
均華資式叙於闈兼秩勲籍增榮勉揚裨贊之才用



答優隆之命

祕書省正字劉巨川可太常寺太祝

勅具官劉巨川朕以爾父歿於王事念往卹孤命爾  
効官列於祕閣當慶賜遂行之際申賞延于世之恩  
勿墜家聲勉揚官業

勅停追官人林嶠等加官

勅勒停前某官某嘗因譴累除削官資既逢慶賜之  
辰方舉棄瑕之典住寮軍倅尉掾奉常勉膺霽霈之  
恩以補曠遺之過

堂後官一十五人轉官

勅國家行藉田之禮覃慶賜之時以爾具官某等素  
以才能早彰勞績丞相之府既列職以為榮王者之  
恩方出綸以均寵蘭臺美秩棘寺華資勉祇荷於寵  
光更靖恭於官次

守當官等二十人受官

勅具官某等各以勞能勤於職次既偶覃恩之際可  
膺進秩之榮宜錫階資或升佐職題與初命勉荷殊  
遷無忘夙夜之勤以答雲雷之澤

故諫議大夫劉保勳可贈工部侍郎

勅生身顯秩歿有追表君親終始之恩彰臣子忠



貞之節况歿於王事殲我邦良宜因覃慶之辰特茂  
飾終之典故具官劉保勲早登華貫素藹嘉稱玉瑄  
融和粹之誠冰壺瑩潔清之操踐更臺閣茂著風猷  
正直表於搢紳簡廉允於公議洎邊羽平戎之後見  
馳驅盡瘁之勞哲人其萎悼百身以何贖徽章有贈  
加三襚以寧忘是用旌爾身魂因予大慶冬官亞卿  
之秩可資漏泉勤王隕命之靈諒歆玄澤申思念往  
式表予懷

前大名府朝城令劉昇可京兆府鄠縣令  
勅具官劉昇宰字邑里部送軍儲間勤幹以奉公因

疾病以難任瘥損引見除授攸宜鄠杜之間賦輿為  
劇臨蒞之際廉恪居先親吾之民勉爾善政

宋州寧陵尉趙合可本州左司理

勅具官趙合朕以州郡理獄之掾必委廉勤聞爾作  
尉寧陵頗彰公幹宜膺新命往蒞取官儻因固以屢  
空加綸綍而豈吝

開封府祇候都孔目官左右軍巡使及諸王  
府內知客等加恩

勅國家因慶覃恩自邇及遠矧京府左右之職王門  
親近之人必均寵甄勞績具官某選於班秩擇



以公才俾祇事於磐維觀恪勤於夙夜果能盡瘁匪懈畏法保躬式當作解之辰宜洽惟新之澤勉膺嘉命益勵忠誠

西頭供奉官白守琪可崇儀副使

勅具官白守琪朕以儀衛之司使副之職必求公幹用稱甄升以俞自列班榮亟膺任委恭恪盡忠之節周通蒞事之能備作彰聞可以遷陟式予職局展乃時才儻著勤勞更茂光寵

耀州節度李繼捧母漢陽郡夫人吳氏可進封南陽郡太夫人祖母河西周氏可特封西

河郡太夫人

勅耕藉之儀則后妃獻種桂之種閨闈之慶則命婦進湯沐之封具官李繼捧母賢和並茂貞淑允修榛栗得婦贄之容蘋藻協母儀之訓生育令子為吾師臣剖符仗鉞之榮既彰家範石窰魚軒之貴宜懋國封勉遵內則之規佇奉公桑之禮

東頭供奉官折御冲可崇儀副使加階勳

勅具官折御冲早列通班素彰勤績祇命屢膺於任使蒞官備悉於器能是用旌酬以勸勞効帖以省秩蕙之憲銜仍觀適用之才俾列副車之職勉於忠恪



以答恩榮

故左僕射致仕贈侍中沈倫可追封魯國公  
勅追榮念舊悼往申思方當覃慶之辰宜舉飾終之  
禮故具官沈倫巖廊耆德社稷純臣輔邦國以貞方  
遺子孫以清白儒行昭明於信史忠規模範於搢紳  
既諧止足之誠遽起殲良之歎德音豈昧慶澤宜優  
龜蒙進大國之封洙泗協漏泉之澤式揚嘉命以慰  
榮魂

六宅副使張茂宗可西京作坊使

勅具官張茂宗嘗以文學早榮科名爰自清班俾從  
使職謙恭周慎所蒞可觀勤幹通明何用不適雖未  
周歲律而益見時才宜自副車之名序遷繕工之局  
表文武之兼濟彰委任於踐更勉答寵光別伸殊効

宰臣三代追封

勅國家覃慶賜之時幽顯迨追崇之典實因賞以示  
勸旌貽厥以延恩某官某曾祖母泚善慈仁既作嬪  
於祖德賢明軌範果垂慶於孫謀宜其光大遶闡昭  
宣輔弼湯沐遺榮於封國雲雷飾寵於漏泉

皇姪孫惟叙等三人加官

勅朕以勸勉三農既舉藉田之禮敦叙九族宜均出



綽之恩所以榮茂本枝孫昌奕世也皇姪孫某等岐  
嶷早彰於令器溫恭自毓於賢才閱詩禮以飾躬諷  
圭璋之比德或慶隆朱邸或粹稟青宮協雅頌於振  
振錫貽謀之翼是用榮之階爵列在拱環兼中臺  
端揆之資加憲府準繩之秩增其勲賞進以戶封爾  
其礪行以砥名勿怠推忠而盡節佩此明訓為吾令  
孫

致仕分司等官加恩

勅國家行藉田之禮內外覃慶澤之恩比雨露以咸  
均協地天之交泰以爾具官某等各以才行萃列班  
資或洛邑分曹荷朝章於結綬或燕居優秩得禮典  
於懸車增其井賦之榮茂以勲階之賞俾膺嘉慶以  
洽鴻私

押東郊進奉衙內指揮使并衙前職負等加  
恩

勅藉田之禮所以獻種稔奉粢盛躬耕既畢於三推  
覃慶是均於萬國某等各以將命來貢明廷宜加勤  
恪之誠俾浹涵濡之澤勉膺寵異更勵公忠

翰林書畫琴阮醫藥等待詔加恩

勅藉田之禮久廢今朕行之慶澤之恩既普與衆同



之某等伎藝精通履行純謹各奉禁林之職夙彰藝圃之名覃恩既洽於涵濡祇寵勿忘於惕厲

中書守當官李恭等五人可薄尉

勅具官李恭等各以公勤供於職次既布惟新之慶宜膺懋賞之恩邑佐親民尉司主盜廉慎勉脩於官業甄升寧各於朝章

退官人張仁操等除官

勅張仁操等有過則既正典章遇赦則必該慶賞宜霈施洪之澤用昭蕩滌之恩改行自新以酬寵渥

攝太祝郭賁可正太祝

勅具官郭賁朕昨率古禮耕藉田祀先農遵故典而太常六祝或有攝官以爾賁恭命祇爾奉職勤勞必也正名以示優渥爾其砥礪用答恩榮

知制誥制

勅朕嘗讀漢書閱其制詔譽不過實詞不近誣有周官之遺風得王言之大體深詳其旨嘉歎久之今命詞臣典于文誥豈惟周漢之制抑慕唐虞之文苟非兼才寧副茲選以爾具官某名鄉之子脩身踐言士流之間好古博雅榮名以文章之價莅事有廉幹之稱宣室召之而與言相府命之以再試甚有詞彩可



以甄升是以寘之掖垣觀其識用俞其秉筆立意代  
予措詞必有宗師勿近浮鄙俾一時訓誥為千載典  
謨也

二

勅朕每讀易至言出乎身加乎民行發乎邇見乎遠  
未嘗不惕然增念所以言必顧行必顧言書之為  
典謨用之成風教以俞具官其素有文學可掌絲綸  
俞知朕之言乎懲惡不近誣獎善不過譽俞知朕之  
行乎舜聞一善以服膺湯務日新以為德俞秉筆之  
際斯言莫忘

拾遺直史館制

勅諫垣之職史閣之才必文學可稱聲實相副加之  
識量方協簡求具官其文必宗經學實為已清慎簡  
直溫恭粹和自中第於時髦既效能於官業聞其聲  
彩是用詔徵列獻替之清曹觀紀述於直筆斯為嘉  
寵俞其勉之

二

勅書館之職不限資地亦無常負惟文學兼著名識  
交茂者得與茲選以俞其榮名時後流譽科場修詞  
益勤為學自懋洎試之蒞事亦藹然有聲是以詔詣



公車待問宣室茂秀文行果稱詢求筆削歲規可以  
超獎佇諫垣之風彩揚史閣之聲光副予憐才無忝  
厥職

三

勅朕以六經之術化於人以三代之文訓於下俗用  
丕變才亦挺生時之得人斯亦為盛以爾其精用意  
於為文無倦勤於積學自掇科第迨歷官常籍之  
名流在衆口翹之選簡于朕心是用升之諫寮寘  
為良史佇爾匪躬之節伸爾執簡之能無俾得人專  
美前代

著作直館制

勅蘭臺著作史閣清華苟非其人何以輕授以爾其  
榮名後造馳譽輩流試之臨民善於為政專於好學  
敏於屬詞吾東觀有書可以資爾之游泳直館之職  
足以榮爾之聲光

二

勅麟臺有著作之局晉則專掌注記唐則兼撰碑辭  
稱是職名必擇英茂以爾其敏於為學長於屬詞性  
稟貞方識六通悟寘之秘閣足茂爾之聲光閱我羣  
書更廣爾之間見無忝甄擢以孤恩榮



諫議大夫制

勅朝廷設諫諍之臣舉歲規之職雖云慎選實在無遺何以忠黨在乎人而用捨由乎上或直言未當或敢諫不從徒為備員適謂虛器也以爾其素有文學頗歷官常効用以來聲塵有得觀其風度之淹雅蹟其理行之貞方是用升于諫垣列為近侍六典謂事之大者遂諍事之小者上封諭無越思靖恭斯職爾無養望或忝厥官佇聞謇諤之名稱我清華之選

幕職州縣官料錢勅

勅王者設官分職求才任能俾庶績以允釐即黎元之受賜然責其廉則豐其祿替其理則足其家朕自臨御以來十有四載或親民之吏或佐幕之寮觀其考課之間悉乃廉平之績苟不均其資俸何以絕其覬覦自來應幕職州縣官料錢皆一分見錢二分折色今有司建議事貴酌中宜令今後中停支與見錢一半支與折色俾令稍足更勵向公凡爾庶寮勉荷優渥



咸平集卷第三十

考詞

錄事參軍朱適

具銜朱某糾轄勤廉監臨辦濟檢身守法精意奉公  
詢於眾人甚有清譽據考課令明於勘覆稽失無隱  
為句檢之最一最以上有一善或無最而有二善為  
中上朱適明於勘覆稽失無隱之外有清慎明著之  
善考課宜為中上

京

兆

田

錫

涇縣簿王中古



具銜王中古考課之令品第有常功即明言過亦具  
舉示否臧之必信冀黜陟而可憑王中古既職簿書  
兼司寇盜閱其所理良亦能官獲賊之功以勞可賞  
輸銅之罰非已受賦依長定格宣省有殿罰者其考  
亦降一等今考宜書中下

太平令賈昭偉

具銜賈昭偉宰理太平縣應二考版圖閱戶數及三  
千地賦所征摠有二萬國家恩信逮下凋弊漸蘇而  
能莅事施勞在公無過考課品第格令分明善不妄  
加詞尚撫實今考依書中上

太平簿張誦

具銜張誦披詳考帳品教政能市肆無賒苛見其廉  
也宣省無責罰知其寡過也擒獲正賊表其有功也  
佐理一邑彰聞三善飾詞難下恐亂否臧實可稱  
信若符璽依令與格考書中

南陵令孫甚夷

具銜孫甚夷國家克復江南選擇良吏委之宰字俾  
無凋殘孫甚夷邑在南陵政稱寬簡版圖計戶流者  
旋歸輿賦常程欠者有納准長定格第二考且書常  
考宜曰中上



南陵簿楊光益

具銜楊光益佐理南陵諳詳吏道郡中諸掾稱舉其名無何司寇闕負俾之承乏觀其所理勤恪廉平召而與言謹密恭遜洎來書考再審厥官在任無曠遺蒞事能幹辦初考獲賊准格不許更書今考獲賊依令得以稱善據考課令四善二十七最中恪勤匪懈為一善職事修理供承強濟為監掌之最一最以上有一善為中上品較諸邑課績可稱雖進考有文而定格難越俟至終考旌陟良才今依書為中

寧國簿康震

具銜康震邑有萬戶闕令與尉能兼其職善守厥官有司稱刑獄無冤考帳見宣省無罰頻獲盜賊良辦徵輸考司憑品較之詞真筆絕否臧之幸依按格令書曰中

宣城令母克温

具銜母克温宣州六邑宣城居首閱其版籍僅二萬戶較其租賦盈十萬數兵戈之後災歟相仍凋瘵之餘葺理非易母克温植性寬簡蒞事廉平既闕佐寮又兼捕盜考較在任自無踈遺品第其功依書中上

司法參軍張玄珪



具銜張玄珪精詳法書諳熟吏道勤廉通悟而秉節  
無渝遜順恭和而臨事有斷聖朝平復疆土擒滅姦  
雄吳之真區宣為劇郡習俗未深於教化比年仍值  
於凶荒民貧盜生自掇刑細訟多事冗空黷政條張  
玄珪三載莅官庶事能理有司勘帳稱獄無冤考狀  
較能直詞無愧據考課令推鞠得情處斷平允為法  
官之最公平可稱為一善有善有最書為中：

汪縣簿王中古

具銜王中古莅官以來今滿二考邑吏供帳府掾按  
詞課績有無臨莅減否煥然斯在可得而書徵督租

征多及分數取責市肆稱無賒苛仍獲賊徒足為功  
課今依令格書為中：

旌德簿劉德元

具銜劉德元詳覆版圖考閱帳狀旌德名邑令尉關  
負能兼取官無曠所理擒捕盜賊徵督賦輿詢會有  
司比較終考無宣省責罰無市肆賒苛臨莅疲民庶  
幾奉職按格考第書曰中：

錄事參軍朱適

具銜朱適宣城之郡古號名藩皇風近被於今吳遺  
俗尚疑於大信民鮮畏法獄不暇空矧以歲徵之征



踰五十萬月供之籍僅百餘帳管庫出納儲廩收支  
向稽簿書主掌刑禁適蒞取職衆稱其廉年任再周  
課考有令善最如一品第無私詞何敢誣書為中上  
南陵令孫甚夷

具銜孫甚夷自宰南陵已周三考常式書於茂績  
有司上請於直詞湖鄉地卑水潦繼作吳中俗薄恩  
信未知加以農鮮服勤逃者大半賦有常限勅有倚  
徵課第減否帳狀可覆詢於掾吏援行格文事有可  
憑許書常考曰中上

南陵簿楊光益

具銜楊光益司寇改為司理聖朝新典也楊光益自  
自南陵權理院事將僅周歲乃得替人有司具舉其  
勞能常式請書其考第因閱所斷之獄杖刑三百七  
十九徒罪三十五大辟五十六輕繫遞罰摠而計之  
凡七百餘人吏稱廉平人無怨讟直筆旌顯書曰中  
中

寧國簿康震

具銜康震寧國萬戶之邑征賦管權僅十餘萬朝廷  
選吏難可其人震蒞取官令尉俱闕上兼宰字之政  
下摠擒捕之司邑無流民人鮮為盜徵歛云足征利



弗虧衆人悅寬裕之心諸邑推辦集之地按考帳而  
下直筆固無矯焉考書中、合終考之格令也

司法參軍張玄珪

具銜張玄珪國家長定格考課條件凡一十有六應  
州縣吏負考滿未替在任復經於周歲有例許書於  
四考張玄珪掌丹筆定刑之外兼權戶掾仍主句司  
錢穀簿書常勤較覆賦輿條限靡住舉行戶雖有逃  
稅幸登數詳條內災沴之處許得常考六邑乃江湖  
之地頻年罹水潦之災考書中、合常式

宣城令母克温

具銜母克温在蜀乃公卿之後聖朝受擢用之恩渡  
江而南莅宣首邑性寬裕政簡易在任滿四載今書  
第四考夏徵之賦及九分已上災傷水潦戶逃二千  
四百按格令之常式詳考課之舊條直筆無私書為  
中上

太平簿張誦

具銜張誦與賈昭偉共理太平之邑俱滿三考司分  
雙伸於考帳品量各見其官才戶口存亡賦輿納欠  
課績次第減否無殊書為中、循舊式也

太平令賈昭偉



具銜賈昭偉國家設考課之法官吏在任功過必書  
將以憑否臧而定黜陟也江南歲多不稔農鮮服勤  
信卜筮而佞鬼神棄耕桑而從細畧是以民無土著  
家無積儲太平在八邑之間土田瘠而物貨薄災傷  
之地常考可書今依仍第二考書為中上

涇縣簿王中古

具銜王中古涇州獨理考限三周常程賦租徵斂有  
足令火盜賊擒捕無遺品第功勞直詞無愧中之  
考依格而書

咸平集卷第三十終



先君贈工部郎中墓碣

先君諱懿字伯達嘗誨諭曰余世本京兆人因唐末

亂離僖宗幸蜀翁祖徙家至于此錫披譜謀錫高祖

開曾祖易直祖誠皆高尚不仕先君好術數聚書數

千卷博施濟衆交親有婚嫁之累而屢貧者悉為嫁

娶焉捐館之年無疾而終嘗先會鄉里別親族大署

于廳事之南廡壁曰亡六月二十三日果於是日終

焉蜀後主時陵州刺史趙庭讓聞先君好古博施之

名署攝本郡司馬享年四十有八以丁巳年六月二

十三日終乃周顯德五年蜀廣政二年冬十二月八日



葬于縣西北歸仁鄉崇教里大塋也先君嘗作壽墳  
既而筮之曰斯墳也吾不得而居之洎沒後果別卜  
宅兆而葬焉先夫人楊氏世以孝行稱事舅姑以孝  
聞婦道毋儀合於詩禮甲寅年十一月五日終享年  
四十三乙卯年春二月葬在先君墳西南五十步以  
龜筮叶從不宜行合祔之禮由是先君之葬同大塋  
而別封樹錫兄弟三人兄繼雲錫名繼冲後改曰錫  
弟繼英姊一人適宗知讓妹二人仲適鮮延壽季適  
楊懷貴俱以令洲聞雲後更曰筠錫入關拔解開封  
府寄應首薦御前就試太宗嗣位之三載歲在戊寅

九月二日一舉登第釋褐將作監丞歷著作郎左拾  
遺右補闕起居舍人知制誥兵部員外郎戶部吏部  
郎中弟英在故鄉守先人之舊廬錫弟兄相次云亡  
兄亡於鄭弟終于蜀錫幼好讀書慕揚雄相如為文  
先君曰觀爾之性必光大吾門也當立身揚名勉副  
吾望吾望乎爾也歷諫省拜章言事太宗以勅書獎  
諭曰勅田錫省所上書具悉汝賢路奮身諫垣就列  
罔効循々之輩竊祿居官思齊諤々之臣拜章言事  
適符虛佇諒慰深衷朕頃以交趾封郵非時怙亂廣  
南轉運有狀奏聞言其王師之家枉被賊臣所害念



其曾未効貢豈可不為救災爰命偏師往安彼俗固  
不貪其土地况尋罷其干戈且如京西閑田素來寢  
下就開池沼良有其由一則以安泊戰船一則以澄  
渟水潦既益皇都之壯麗亦資士庶之遨遊况其執  
役之流皆是下軍之士固不曾差驅編戶妨奪農功  
又如髡鉗之刑前王所用若比之於劓刑諒有其等  
差且令斲頭之徒得遂全身之路誠非酷法却太好  
生自覽爾封章固亦軫余懷抱見令檢尋制度別較  
重輕今後凡有見聞更在無辭獻替或行或寢斷自  
朕心盡節盡忠勿渝爾志其於嘉歎無廢寐興故滋

獎諭想宜知悉洎太宗晏駕皇上嗣位太宗  
所賜勅書已編於實錄矣先君訓諭之言俾立身揚  
名以光門族幸兩朝遭遇聖主身既立而名已揚  
矣先君累贈工部郎中先夫人追封京兆縣太君慮  
年紀寢遠乃撰表墓之碣立于先君夫人二墳之間  
嗚呼霜露之感載懷怵惕風樹之悲無所迨及思晝  
錦還鄉而未遂涕泣西望因嘉州通判大理評事萬  
簡赴任託呂妹夫楊懷貴與姪嗣宗同訪求貞石以  
刻斯文時咸平五年歲在壬寅冬十月十日嗣子朝  
請大夫尚書吏部郎中兼侍御史知雜事上



北縣

戶口  
三  
百  
戶

魚  
袋  
坊  
撰





